

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR EIGHTH SITTING ON THURSDAY, THE 16th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **PU ZORAMTHANGA**, hon. Chief Minister to lay on the Table of the House a copy of each of following :
 - i) Report of the Comptroller and Auditor General of India on Social, Economic and Revenue Sectors for the year ended 31 March 2020.
 - ii) Finance Accounts 2021-22 Volume-I Government of Mizoram.
 - iii) Finance Accounts 2021-22 Volume-II Government of Mizoram.
 - iv) Appropriation Accounts 2021-22 Government of Mizoram.

FINANCIAL BUSINESS

3. General discussion on the Budget for the year 2023-24 (to commence)

LALHMAHRUAIA ZOTE
Commissioner & Secretary

SPEAKER : “*Mi tin engtia chhan theuh tur nge ni tih in hriat theih nan in tawngka chhuak chu, chi a al, khawngaihna tel ni fo rawh se.*”

- Kolosa 4:6

QUESTIONS & ANSWERS

Zawhna & Chhanna-ah kan kal ang a. Starred Question No. 101 - zawt turin Member zahawm tak Pu Lalchhuanthanga ka sawm e.

PU LALCHHUANTHANGA: Pu Speaker, ka lawm e.

Ka Starred Question No. 101 ka zawhnaah hian figure tihsual palh kan lo nei hlauh mai a, rem i tih chuan, han zawh loh mai kha kan duh a ni e.

SPEAKER : Awle, i withdraw a ni maw? (**Pu Lalchhuanthanga:** Aw, ka withdraw e.) Awle, a zawttu thu a ni e.

Tunah chuan, Starred Question No.102 - Zawt turin Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. Ka zawhna Starred Question No.102 – Hon’ Minister, Public Health Engineering Department chhan atan –
“JJM Scheme hmanga solar pump te hman anih vek theih hunah Mizoram-ah tui-thianghlim engzat nge nitin pump theih a ni ang?” tih a ni e.

SPEAKER : Chhang turin a changtu Minister, Dy. Chief Minister zahawm tak ni bawk, Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, member zahawm tak Dr. Vanlaltanpuia zawhna chhanna chu –

JJM hmanga solar pump-te hman anih vek theih hunah chuan tui-thianghlim nitin liter maktaduah 10.2 a pechhuak thei ang.

SPEAKER : *Zawhbelhna* - Zawhna neitu, Member zahawm tak, Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e.

Kan Dy. Chief Minister zahawm tak, PHE department changtu department hian thil ropui tak kan bial min tihsak a, kan lawm hle a. Kan bial Lunglei North-ah hian khaw 21 a awm a, khaw 4 chiah hi Lunglei-Greater Water Supply scheme nei an awm a. He Ministry-ah hian khua, tui la neilo zawng zawngte tui pump-na turin hma min lak

sak a, tunah hian solar project scheme min tih sak in, min tender sak a, kan lawm em em a; bial aiawh pawhin lawmthu kan sawi a.

Tin, Mizoram mipui aiawh pawhin lawmthu sawi hi tulin ka hria a. Development hi e-Gadgets tha tak tak iphone te kan ken tawh lai in mahni inah tui herhhaw tur kan la neilo te hi, development hi a inkalthelh nasa em em a. He department-in hetiang a rawn siam tha hi lawmawm ka ti em em a ni.

Kan zawhbelhna chu – “Tuna solar project tender bakah hian kumthar atan hian la felhlel deuh ho khua pek theihna dan hi a la awm em? He JJM Scheme hi engtik thleng nge hman anih dawn” tih te ka zawhbelhna a ni e. Ka lawm e.

SPEAKER : *Zawhbelhna* - Member zahawm tak, Pu Zodintluanga Ralte.

PU ZODINTLUANGA RALTE: Pu Speaker, ka lawm e.

Hei, ka bial Bunghmun-ah Solar pumping buaipui a ni a, a tanky leh pipeline te zawh tawh a ni a. A khawl lampang, a solar titute hi an reh rei riau mai a. A tanky leh pipeline te siama, fit anih chuan hman tangkai mai theih tur a ni a. Kha kha a rang lamin kan contractor te hi min lo nawr sak thei ang em?

Pahnihna-ah chuan, a contractor te hi Pu Speaker, an hnathawh zawhna a rei tawh a, mahse sum an la hmu lova. Party-worker te an ni a, an pek har chuan kan lamah an rawn kal mai dawn a. ‘An pek theih chuan’ tiin ka rawn dilpui a ni e. Ka lawm e.

SPEAKER : *Zawhbelhna* - Member zahawm tak, Dr F. Lalnunmawia.

DR. F. LALNUNMAWIA : Pu Speaker, ka zawhbelhna chu hei hi a ni –

Mizoram hmun tam zawkah tui kan hnianghnar chhoh mek lai in kan bial Saikhamakawn leh Hlimen Vengthar-ah te chuan tui an la harsa khawp mai a. Chu an indaihlohna puhru tur chuan AMRUT scheme atanga proposal siam sak anni a. Kha kha “engtika thawh theih nge ni ang” tih ka zawt a ni e. Ka lawm e.

SPEAKER : Awle; a theih ang ang a chhang turin a changtu, Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, zawhna neitu a Dr. Vanlaltanpuia zawhbelhna chhanna chu –

JJM scheme hi anih phungah chuan 2024 thleng tur a ni a. Tichuan, Central lama JJM hotute khuan keimahni Mizoram bik erawh chu ‘2023-ah zawh tum rawh u’ min ti a, hma kan lakna an hmuhin min beiseina a sang a. Chutiang chuan, he scheme hi kan bawhzui tang tang a, anih phungah chuan 2024 a zawh tur a ni.

Tin, South-III bialtu, Dr Mawitea zawhna kha - Tunah hian AMRUT-2 ah proposal siamin kan submit mek a. Chutah chuan engangin nge min rawn approve dan tur kan hrelo chungin, “allocation awm saa thawh tur, proposal rawn pe lut rawh u” an tih anga pek luh a ni a, an rawn approve pawh kan beisei viau a ni.

Tin, Thorang bialtu Pu Zodintluanga zawhna kha - Theihpatawpin khalai kha chu kan lo bawhzui ang a, chak taka thawk turin kan lo ti ang e. A bill pawh kha, ni e, in duhsakna kha kan lawm zawng tak a ni a, theihpatawp chhuahin, a rang thei ang berin pek kan lo tum dawn nia.

SPEAKER : Starred Question 103 - Zawt turin Member zahawm tak, Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Starred Question No.103 – Dy. Chief Minister zahawm tak chhan atan -
“Ka bial chhunga Hmundo leh Puankhai khuaah te hian tui connection pek tumna a awm em?” tih leh, “Awm ta se, engtikah nge?” tih a ni e.

SPEAKER : Chhang turin, a changtu Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, Pu Nihar Kanti Chakma, West Tuipui bialtu zahawm tak zawhna chhanna chu –
Hmundo-ah hian tui connection in 33-ah pek tum a ni a, Puankhai-ah in 258-ah pek tum a ni bawh a ni. Tin, Hmundo leh Puankhai-ah te hian pipe phurh luh mek a ni a, fur lain kawng a thatloh avangin kan phur-lut thei lova. Tunah hian pipe phurh thlen tawh a ni a, thawh chhonzawm nghal bawrh bawrh niin, thal chhunga thawh zawh tumin hma kan la mek a ni e.

SPEAKER : *Zawhbelhna* - Zawhna neitu Member zahawm tak Pu Nihar Kanti Chakma.

PU NIHAR KANTI CHAKMA: Pu Speaker, ka lawm e.

Minister zahawm tak khan a amount, a thawktu hming leh, engtika zawh tur nge tih min hrilh thei em?

SPEAKER : *Zawhbelhna* - Dr. K. Pachhunga.

DR. K. PACHHUNGA : Pu Speaker, ka lawm e.

Hei, kan hriat theuh angin climate change avangin extreme weather kan nei a. Vawin hi a vawt lutuk a, khua a roin, a ro leh luluk a, tui te a kang nasa a. A bikin thal laiin Lunglei khawpua kan tui pump neih chhun saw a rei tawh a. Mipui kan lo tam ve zel avangin thalah kan khawp kham tawh lo em em a. Mat Lui pump tumna sorkar hmasaah pawh a awm tawh a, mahse kan la tih hleithei lova.

Ka zawhbelh duh chu – Lunglei Greater Water Supply Phase-II Mat Lui pump-na hi engnge kan dinhmun?

Tin, Theiriati Vai Lui-a hmalakna hi kan lawm takzet a. Tin, JJM hmalakna ka bial chhung thingtlang khaw 31-ah tui hnianghnar min pe dawn a, solar pump kan ti mek a, kan phur em em a, PHE Department chungah kan lawm tak zet a. Lunglei-a PHE hotute an fakawm a, hna pawh an thawk tha a.

Ka zawhna chu – “Thal laia Lunglei tui harsatna hi tunah eng dinhmunah chiah nge kan din” tih kha Pu Speaker, min hrilh theih chuan ka lawm hle ang.

SPEAKER : *Zawhbelhna* - Pu C. Ngunlianchunga. Zawhna - No. 105, 106, 108 a la awm a, thleng hman hram ang u.

PU C. NGUNLIANCHUNGA: Pu Speaker, ka lawm e.

PHE Minister zahawm tak ka zawhbelhna chu –

Pakhatna - Lawngtlai Greater Water Supply orientation ti tura ruahmanna awm kha eng chen nge kalpui a nih tawh?

Pahnihna - Mampui ka bial khi solar pump tura scheme a ni a. Lawngtlai-Greater Water Supply Scheme atanga pump chho tum a ni a, kha kha engchen nge kalpui anih tawh? Zawh anih loh pheih chuan Lawngtlai khawpuiin tui kan indaih lova, Mampui han pek leh kha a chi dawn em ni?

Pathumna - helai House-a Governor Speech-ah pawh kan sawi-chhuah, JJM hnuaia mimal in connection pekna GI pipe ni lova plastic pipe hman kha a tha lo hle a. Pu Speaker, helaiah pawh hian kan sawi tawh a, kha kha GI pipe-in thlak theih a ni ang em? Anih loh chuan, thingtlang connection kan pek te kha fit sak a ni a, thing leh eng emawin tichhia a, tih that leh an tan thil harsa tak anih avangin GI pipe-a thlak theih a nih ang em, plastic pipe lo fit tawh te kha?

SPEAKER : I zawh tawh kha maw le aw? Awle, a karki viau nain a theih ang ang chhang turin Deputy Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, zawhna neitu Pu Nihar zawhna - A bial chhunga hnathawktute kha nakinah an hming kan pe thei mai ang che; tunah chuan ka kawl mai lova.

Tin, Lunglei South Bialtu Dr. K. Pachhunga leh North bialtu pawhin lawmthu te an sawi a, ngaihthlak a nuam ka ti khawp mai.

JJM scheme-ah hian thingtlang khawtin tuam a ni a, a lawmawm tak zet zet a. Department-ah pawh, “kan chance tha hi kan hloh tur a ni lova, hna pawh chak takin thawk rawh u”, kan ti a, kan phur viau a ni. JJM scheme kan thawh hi nuam kan tiin, vannei pawh kan inti em em a ni. ‘Lawmthu sawina han hria te kha, department kan lawm a ni’ tih ka sawi duh a.

Tin, Lunglei khawpui hi Pu Speaker, ‘Second capital’ a nih ang hian kan ngai pawimawh a. Amaherawhchu, tui pump kan neih lai existing scheme saw a upa tawh a, a thiamawm a, a khawl te pawh a chak tawk lova. Chu bakah thal laia kan tui tlan ber Tlawng hnar saw Pialthleng leh Zobawk lamah sawn duh aiin a haw tlem thin a. Chu chuan harsatna tam tak min siam a. Chuvang chuan, Lunglei-Greater Water Supply Scheme hi rintlak, sustainable-ah kan siam ang kan ti a. Chutianga ruahmanna kan siam chu WAPCOS-in a bawhzui a. Mat Lui saw Sairep tlangah gravitation-a pump chhohin Lunglei khawpuiah a luang lut dawn a ni. Scheme lian-pui a ni a, tunah hian Central Ministry-ah bawhzui lai mek a ni.

Tin, chumi tih chhung chuan tunah hian sorkarin Lunglei hi importance pein Special Assistance atangin cheng vaibelchhia 10 in tunah hian hmun hniah hna kan thawk mawlh mawlh a, kuminah hian zawh kan tum a, tuna existing scheme (kan hman lai) belhchhahna tur saw a ni a. Nichinah khan Member zahawm takin “Theiri atanga Vai Tui pump” a tih te kha a huam vek a ni a.

Tin, Lunglei East bialtuin a sawi thin angin, Zobawk tlangah sawn tuikhuah lian tak kan siam a ni. Ka sawi duh tak chu, Lunglei khawpuia kan tui neih lai te pawh tipung turin sorkarin theihtawp a chhuah a ni.

Chumai bakah chuan, AMRUT-II hian vanneithlak takin water supply hi an rawn uar a, AMRUT-II atangin cheng vaiblechhia 9.98 man Lunglei tan DPR kan siam a, chu chu nichina kan sawi kha a ni. Lunglei existing Scheme ti phui-sui turin augmentation atan hma kan la a ni.

Tin, Lawngtlai bialtu zahawm takin Mampui tui pek dan tur a sawi kha, nichina ka sawi Lunglei rual khan WAPCOS hian Lawngtlai-Greater Water Supply Scheme a siam a, Chhimtuipui tui pump chhoh turin kan ti a, Lawngtlai atanga pump tur anih ka ring a, “A scheme kha bawhzui mek a ni” tih khan a chiang maiin ka ring a.

JJM scheme hnuai Jal Shakti Ministry hian ngaihndan hrang hrang te an nei thin a. Member zahawm tak ten in han ngaihpawimawh plastic pipe (‘PVP’ an tiin ka hria a, a technical), ‘hei hi a hmantlak em ni’ tih kha, Jal Shakti official ten ‘hei hi hman theih a ni e, in duh chuan hmang rawh u,’ an tih avanga hmang kan ni. Thelret pipe kan hman hi a kalkawngah ni lovin, khaw chhunga water connection pekna tur mai a ni a, a rintlak thawkhat ve chuan kan hre tlat. Pu Speaker, ‘hei hi chutianga iai turah kan ngai lo e’ tih kha kan chhanna a ni e.

SPEAKER : Starred Question No. 104 - Member zahawm tak Pu Lalduhoma zawt turin ka sawm e.

PU LALDUHOMA : Pu Speaker, Higher & Technical Education Department changtu Minister chhan atan, ka zawhna -

- a) Zirlaite tuition fee atang hian eng vangin nge sorkarin chhiah a lak
- b) Eng tik atangin nge a lak?
- c) Engzat nge a lak tawh?
- d) Zirlai pakhat atangin engzat nge a lak?
- e) A hmanna eng te nge?

SPEAKER : Chhang turin Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, Pu Lalduhoma zawhna chhanna chu –

- a) Zirlai tuition fee atang hian sorkarin chhiah a la lova, tuition fee hi sorkar revenue niin Govt. account-ah chhunluh thin a ni. Tuition Fee mai ni lovin, college-in a hman tur ang chi fee chi hrang hrang tam tak a la hrim hrim a ni. College-in a lakkhawm kha govt. revenue-ah a chhunglut a ni.
- b) Govt-in college a take over-a (provincial kan ti dawn nge) govt. anih atang khan lak a ni.
- c) ‘Engzat nge a lak tawh’ tih hi - A rei tawh khawp mai a, han chhui kha a buaithlak a, ziakin kan pe thei mai turah ngai ila. Kum 5 chhung kan update thei ang a. Tuition fee bikah hian kum khat atan hian ₹1,200/- student zirlai pakhat atanga lak a ni.
- d) Kum 2018 - 2019 ah 1,69,00,000/-;
Kum 2019 - 2020 ah 1,66,82,736/-;
Kum 2020 - 2021 ah 1,63,00,168/-;
Kum 2021 - 2022 ah 1,89,33,300/-;

Kum 2022 - 2023 ah 1,93,65,600/-

*Hei hi chhiah ni lovin tuition fee bik a ni.

- e) Govt. account a chhun luh a nih hnu hian a hmanna lampang hi department hian kan hre zui lo a ni.

SPEAKER : *Zawhbelhna* - Pu Lalduhoma.

PU LALDUHOMA : Pu Speaker, hemi tuition fee bika hi tun hmain sorkarah thehluh thin a ni a, a hmanna pawh a tul-tulah, a changtu minister te pawhin an hriatpui phak lohin a awm thin a. Tunah hian kan zirlai ten chu chu tha an ti lova, MSU te huaihawtin kawng-zawh hial te buatsaih a ni ta a, “tun atang chuan tuition fee tlingkhawm hi a college tihchangtlun nan hman ni tawh rawh se” ti khan an ngen a, sorkar nen inremna tha tak an siam ta niin kan hria a.

Ka zawhbelhna chu - Tun budget tharah hian tuition fee hi college tih changtlun nan dah a ni ta em? Zirlai hruaitute nena an inrem-siamna ang khan kalpui a ni ta em? tih a ni.

SPEAKER : *Zawhbelhna* - Pu KT Rokhaw.

PU K.T. ROKHAW : Pu Speaker, kan Minister hnena ka zawh belh duh chu –

Pakhatna - Govt. Siaha College-a Science Department dah let leh turin session apiang hian ka sawi thin a, vawiin ni thleng hian dah a la ni lova, khawngaihin RUSA hnuaia Asst. Professor an lak te atang hian Govt. Siaha College-ah hian Science Department min dah sak thei a ngem?

Pahnihna - Govt. Siaha College hi Mizoram-a district 3 chauh - Aizawl, Lunglei leh Chhimtuipui te anih lai pawhin Chhimtuipui District-a headquarter anihna angin Siaha College lo din leh, chutih lai atang tawha Science stream hi kan lo nei tawh a ni a, mahse engvang emawin hmun dangah sawn a ni a. Kan dil kan dil thin a, vawiin ni thlenga dah let a la ni lo hi a mipuite rilru pawh a na hle a ni.

Tin, Siaha College-ah zirlai tam tak hi awmna tur nei lo, mi in-luah leh chhungte bula awm an ni a, zirna kawngah harsatna tam tak an tawk a. Chuvangin, zirlaite awmna tur, a bik takin Boys Hostel min sak sak theih ang em? Ka lawm e.

SPEAKER : *Zawhbelhna* - Pu Lalrintluanga Sailo.

PU LALRINTLUANGA SAILO: Pu Speaker, ka lawm e.

April Ni 17, 2021 Serchhip bye-election neiha MPS buatsaih Thenzawl Joint YMA Hall-a khatih laia ZPM Group Leader candidate Pu Lalduhoma sawi, “Thenzawl-in college an mamawh hle tawh a, sorkarin hma a la lo anih pawhin hei hi min hmuitu tur college ka hual lawk tawh a, thlan tlin ka nih chuan chak takin college dinna turin hma ka la nghal ang” tih hi sorkarin a hriatpui em?

SPEAKER : Chhang turin Dr. R. Lalthangliana, a changtu minister zahawm tak ka sawm e.

DR. R. LALTHANGLIANA, MINISTER: A hla ber atangin kan chhang mai ang a.

Pu KT Rokhaw zawhna hi session apiangin kan sawi thin a, a dik khawp mai a. Tunhmain ‘Siaha college-ah hian science awm se’ tih ruahmanna te a awm thin a, amaherawhchu zirlai tur kha an awm lo tih report kan dawng a, file ah pawh thil tam tak a kal chho tawh a, tunhnaiah pawh hian dah chu tha kan ti khawp mai a. Chhim lampanga science zirna awm chu Lunglei a ni mai a, chhim tawp lampang tan chuan a hla lutuk ve deuh a. Han ngaihtuah chian ngai tam tak a awm a.

‘Tun tuma Asst. Professor lak’ tih ai mah khan Govt. college hlankaia thawk contract basis mi 64 zingah khan science subject an tam loh phei chuan, khata tanga va hnawhluh ngawt theih kha a ni lova. tin college thenkhat science zirna mamawh chhunkhahna tur atan te tih a lo ni leh a, chuvangin a buaithlak deuh a, ngun taka ngaihtuah a ngai a. Kan exercise nasa tawh khawp mai a, hemi chungchang hi. Science zir dawn hian an hlawh ringawt a ni lova, equipment, laboratory-te leh thil dang dang a kaihhnawih tam tak a awm a. Tin, lecturer ringawt pawh a ni chiah lova, anmahni puitu ang chi tam tak a ngai a. Kan han hisap thuak-thuak hian kum khatah nuai 300 aia tlem lo hi a ngai hrim hrimin kan hria a, thil hrang hrang ngaituah ngaite nen. Khami area-in zirlai naupang a dahkhawm theih zat tur, admission ti thei zat tur zawng-zawng nen a thara ngaihtuah tak tak a ngai dawn a, kan sorkar sum dinhmun te nena en telin. A sawi zing a, a hriat pawh hi kan hre viau tawhin ka hria, hemi chungchang hi.

Tin, Pu Lalrintluanga Sailo zawhna “Thenzawl College din chungchang hi chu (*interruption*)

PU K.T. ROKHAW : Siaha Govt. College Boys Hostel chungchang kha, khawngaihin?

DR. R. LALTHANGLIANA, MINISTER: Theihtawp kan chhuah chho ang a, sum kan hmuh theih dan tur hi a state sorkar atang chuan a har a, pawn lampang atangin ngaihtuahna kan seng a. Siaha college chauh ni lo, Mizoram-a college tam takte, ram an neih zau chuan hei hi ruahmanna kan nei a, Siaha pawh a tel turah ka ngai a, tunah

hian project lian tak kan siam mek a. Amaherawh chu, a tak ram thleng thei anih dawn leh dawn loh chu ka sawi thei chiah lova, ‘ngaih pawimawhah kan nei e’ tih kha ka han sawi a ni.

Tin, Thenzawl college din chungchang hi, sorkar ang chuan kan hriatpui lova. College hi a awmlohnaah hian a pawnga takin va din ngawt hi a ni chiah lova, a kalphung a awm a, kan hre vek a. Tute emaw, khawtlang VC te leh association hrang hrangte nena bul han tan ve phawt a ngai a ni. College chauh a ni lova, Elementary te, Primary leh Middle zawng-zawng te pawh a khawtlangin bul an tan a ngai a, chutianga bultanna a awm leh awmlah kan hre thei chiah lova.

Tin, zawhna neitu zawhna kha - Tlem lai deuh khan MSU te nen kan sawitlang a. Tin, chu bakah ngun deuha thil ngaihtuah ngai a awm a. Fee lo lut zawng zawng nia kan hriat hi government-ah hian a zavaia pawngpaw lo hman ngawt hi phal a ni lova; India Constitution Article 284-ah hian chiang deuhin chu chu a ziaa a. College-in direct-in a hman theihloh a, tuition fee leh eng emaw fee bik hman theihloh a awm a ni. Chu chu a chiang khawp mai a, ‘public account-ah chhunluh vek tur’ tih hi India ram hmun tinah hman tur chi constitution a awm a, chu chu, Rules No.8 of A(i), General Financial Rules ah hian a awm kalh mai a.

Finance Department nen pawh he mi chungchang an rawn thlena kan sawihonaah pawh min hrilhfiyah a, hman theihloh fee structure a awm a ni. Chumi nilo a dang hi chu, kan han sawi thin ‘college inrelbawlna hi a hautak ve si a’ tiin phal chin chauh hman thei tur tein ruahmanna chu kan siam a ni.

Tin, sorkarin a phalsak ang khan budget hrim-hrimah hian nuai ₹120/- dah niin ka hria a, ka la keu chiah lova, (min han zawh thutah khan) ka sawi dik ang chu maw. Chu chu wawinah hian an tana hma kan lakna deuh chu a ni a. 2023-2024 budget-ah nuai ₹120/-, kan CM pawhin min hriatpui a, Finance Deptt-in min dah sak niin kan hria a, an chungah pawh lawmthu ka han sawi nghal a.

Chu bakah chuan, an fee structure hi ‘college zawng-zawngah a inang vek lo’ tih hi ka sawi duh a. *Entirnan*: Govt. College rau-rauah Govt. Law College ang te fee structure, a zat leh thildang kha kha a dang a ni. Tin, IASE kan lo nei leh a, BS te, MS te Ph. D te tih theihna tur ang chi, khanga an fee kha a dang a. Mizoram Polytechnic Lunglei-ah kan nei a, Durtlang Aizawl-ah kan nei leh a, Hindi Training College nen, tikhan an fee structure kha a inang lo ve hrim-hrim a. Chuvang chuan, rualkhai deuha han sawi mai kha a harsa a. Chu chu House pawh hian min hriatsak a thain ka ring a. A zavaia fee structure, item 20 vel awm, khang zawng zawngah kha chu pawngpaw hman theih vek kha a ni lova. Hman theihloh tlemte, constitution bikina strict taka a kalpui, kan zawm ngai a awm a ni tih kha hre ta ila. Ka lawm e.

PU LALDUHOMA : Thenzawl sawn ‘college nei ve ila’ kan ti a, a ngaihtuahtu pawl an din a, a bul tanna atan Serchhip college-in ‘kan lo hmui ang che u a tul chen chen’ an ti a, thil huphurhawm tak a ni a. Mahse tunah sawn hmalak mek a ni a, kha kha Minister zahawmtak kha kan chhanpui a ni.

SPEAKER : Campaign thu zawng-zawng nen helaiah chuan i lalut lo ang u.

Starred Question No. 105 - Zawt turin Member zahawm tak Pu Ramthanmawia ka sawm e.

PU RAMTHANMAWIA : Pu Speaker kalawm e. Ka zawhna Starred Question No. 105 chu hei hi a ni -

- a) Mizoram pumah JJM scheme hi khaw engzatah nge thawh zawh anih tawh?
- b) Khaw engzat nge hmabak la awm?
- c) Engtikah nge thawh zawh theih anih ang?

SPEAKER : Chhang turin a changtu Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Pu Ramthanmawia zawhna chhanna chu -

- a) Khaw 263 ah thawh zawh tawh a ni.
- b) Khaw 465 hmabak a la awm.
- c) Heng khaw 465 thawh hmabak te hi tunah thawh mek a ni a, nichina ka sawi ang khan central chuan ‘December 2023 ah zawh hman tum rawh u’ min ti a, chumi tipuitling tur chuan kan bei tang-tang a, ‘kan zo thei ang em’ tih erawh chu sawi a har hrih a ni.

SPEAKER : *Zawhbelhna* - Member zahawm tak Pu Ramthanmawia.

PU RAMTHANMAWIA : Pu Speaker kalawm e.

Hei, mihring tan tui a pawimawh zia kan hria a, a tel lovin kan awm thei lova. Ka bialah pawh hian tui hi gravitation-a lak a ni deuh vek mai a, chu chu sik leh sa lo danglamin tui a lo tikang a, kan mangang em em mai a. Chutih lai taka he JJM Scheme lo chhuak hi kan lawm em-em mai a, kan lo welcome khawp mai a. Kan Minister zahawm tak leh a changtu department te chungah pawh lawmthu kan sawi a ni. Kan bial khaw 20 chuangah pawh solar pump min buatsaih sak dawn a, kan lawm khawp mai a kan nghakhlel bawk a.

Kan bial ah hian Phase-I leh Phase- II a tender chhuah a ni a, tender hmasa zawk a contractor te solar pump bik ah khan min thawh sak chak turin kan Minister zahawm tak kan Dy. CM hian min nawr sak thei ang em? Thal khat tui nghei pawh hi a hrehawm a, motor tein kan chawi nasa a, kawng hrang hrangin kan buai khawp mai a. A hmasa zawk Phase-I kha nikum lamah tender chhanna pek tawh kha a ni a, heng te hi thawk chak turin min hrilh sak theih chuan kan lawm khawp ang.

SPEAKER : *Zawhbelhna* - Pu BD Chakma.

PU B.D. CHAKMA : Pu Speaker, kalawm e. Kan central sorkar hmalakna zarah JJM hnuai atangin tui-thianghlim Mizoram khaw tinah pek a ni hi central sorkar chungah lawmthu ka sawi ruala ka zawhbelhna duh chu -

- 1) Chawngte-Greater Composite Water Supply Scheme hi engtikah nge zawh anih ang?
- 2) Lawngpuighat-ah hian tui connection hi an la nei miah lova. Kan district khawpuiah Chawngte dawt a ni a, mi tam tak chenna khua a ni a. Chuvangin hetah hian tui supply pek tumna a awm em?
- 3) Kamalanagar-IV Greater Composite Water Supply Scheme hnuai hian distribution line siam mek a ni a, PHE Deptt. atangin mimalin a siamthiam te ruaiin, project hnuai works ang ni lovin hnatlang angin an thawk thin a. Kha kha dan angin phal a ni em?
- 4) PHE distribution line-a PVC hman hi central PHE Minister zahawm takin Aizawl Press Club-a press meet a neihah pawh khan, “GCI aia PVC hman phalna hi ka pe lo” a ti a. Kha kha kan Minister zahawm takin hian thil awmzia min hrilhchiang thei em? Hman phalna central sorkar atangin an hmu reng em” tih kha ka zawhbelhna a ni e, Pu Speaker.

SPEAKER : *Zawhbelhna* - Pu Zothantluanga. A dawtah Pu Mathlantea kha lo zawh khalh tawh suh u.

PU ZOTHANTLUANGA : Pu Speaker, ka lawm e.

Hei, khawpui lian zawng zawngah water supply scheme tha tak takte kan nei a. Tin, thingtlang khua a tam ber ten tunah JJM atangin tui supply tha tak tak an dawng chho baw k a, Mizoram sorkar hmalakna hi a lawmawm a. Amaherawhchu, ka bial Sairang-Sihhmui leh Sairang- Dinthar te JJM hian min cover lova, tin, hemi Aizawl-water supply scheme hian min cover lo baw k a, fur laiin luipui kama awm ni si hi tui kan nghei reng mai a. JJM a min cover ve tur pawhin department hotute ka sawipui thin a, ‘a theih loh’ an ti baw k si a. Chuvang chuan, helai hian tui supply ve theihna tur sorkarin ruahmanna min siamsak thei ang em?

SPEAKER : A theih ang ang chhang turin Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Pu Zothantluanga, West I bialtu zawhna - Sairang leh Sihhmui a bial khua te Aizawl Urban area-a tel, JJM tih rem silo hi ‘harsatna a awm a ni’ tih thu kha department hian a hria a, a ngaipawimawh a.

Nichina ka sawi tak ang khan, Sairang bik hi chu tunah chuan Amrut-II hnuaiia thawh turin proposal-ah telh a ni a. Chutiang chuan, Sairang kan ngaihpaawimawh em avangin tun Amrut-II a telh zingah pawh a hmasa pawlah kan dah a, a lo hlawhtlin ngei pawh kan beisei a ni.

Tin, Chawngte bialtu zawhna kha - PVP pipe hmanphalna kan nei e; a document pawh kan nei central atangin. A bik takin ‘phal’ an tih zingah khan a tel a, ‘chuvang chuan kan hmang a ni’ ka tih kha thudik a ni. Tin, hei hi tui lakna line puma hman ni lovin (*interruption*)

PU C. NGUNLIANCHUNGA: Pu Speaker, khawngaih takin - Khami plastic pipe an hman avanga mipui ten harsatna an tawh kha department hian a hriatpui em le? ‘Hman tlak a ni’ tih kha, thingtlang khua atangin a hmantlakloh zia leh harsatna an tawh zia an sawi tam khawp mai a. Kha kha department khan, ‘hmantlak a ni e’ tih laia kha; hmantlak anih loh dana kha an hriatpui lo em maw ni le?

PU TAWNLUIA, DEPUTY CHIEF MINISTER :... house-connection atana hman a ni a, a tlo ve hrim hrim. A document nen kan pe dawn che u a nia. Chutichuan a chiang mai ang. Central-in a pawm kha chuan kan hmang thiang a ni. A derthawng zawng chuan i sawi tawh lo ang u.

Tin, Chawngte bialtu zahawm tak zawhna kah – Chawngte-a scheme hi a lian a, kan thawk mek a, heng pawh hi nichina kan sawi ang khan, tuna kan scheme kal lai mek ho hi tun thal chhunga a tam thei ang ber zawh hman hram kan tum a. Lawngpuighat distribution line te pawh kha kan en mawlh-mawlh lai a ni a, ‘lo ngaichang zel phawt teh ang u’ tih kha kan chhanna a ni a.

Tin, Pu Ramthanmawia’n, “contractor te nawr hmanhmawh theih a ni ang em” a tih kha, keini pawh kan hmanhmawh a, kan sawi ang khan, central lam atanga nawrna a nasa bawk a. Kumin January thla tir te khan review meeting kan nei a, ‘kumin chu i tang nasa ang u’ kan ti a, kan officer te’n theihtawp an chhuah a. Contractor te nawr ngaia an awm pawhin, kan lo bawhzui turah ngai ila, a tha ang e.

Tichuan, tui chungchang tuna kan han sawi laite pawh a khua zawnga tihputlin tumin, a khuain kan chhiar a, khaw hrang hrangah In tinah connection pek a ni a, ngaihpawlh a awm palh ang tih ka hlau khawp a. Tui, JJM nilo pawh scheme dang solar pumping te kan nei tho mai a. Chuvang chuan, Lunglei North bialtu khan solar hlir kha a rawn sawi ta a. Amarawhchu, JJM lo pawh solar scheme-ah hian eng emaw zat kan nei a; khalai kha nakinah eng emaw ‘ngaihpawlh a awm palh takin’ tih thu ah ka han sawifiah a ni e. Pu Speaker, ka lawm e.

SPEAKER : Starred Question No. 106 - Zawt turin Member zahawm tak Pu VL Zaithanzama i lo sawm ang.

PU VL. ZAITHANZAMA : Pu Speaker, PHE changtu Minister zahawm tak chhan atan ka zawhna te chu –

- a) JJM hnuai chhungkaw tin tui-pekna tur hi khaw engzat nge tuam chhuah a ni tawh?
- b) Khaw engzat nge hmabak la awm? tih a ni e.

SPEAKER : Chhang turin Pu Tawnluia, Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, kan chhan tak nen khan a zawhna a in ang viau a. A chhanna chu -

- a) JJM hnuai chhungkaw tin tui-pekna tur khaw 263 tuam chhuah a ni tawh.
- b) JJM hnuai chhungkaw tin tui-pekna tur khaw 465 hmabak a la awm.

SPEAKER : *Zawhbelhna* - Pu VL Zaithanzama.

PU VL. ZAITHANZAMA: Pu Speaker, ka zawhbelhna chu –

- 1) ‘Tawitlang Atanga gravitation a tui lak buaipui mek hi engtikah nge zawh a nih theih ang’ tih leh, ‘chhungkaw engzatnge a chawm theih ang’ tih a ni a.
- 2) Aizawl West III ah sawn, Aizawl tuilakna phase-I leh phase-III pipe hi a kal tlang ruah mai a, ka bialchhung pumpui saw a paltlang a ni. Chumi kawngah chuan Aizawl-Greater Water Supply Scheme phase-II bik saw, Tuikhuahtlang-ah tui kan han pump chho a, current an off emawin a lo tawp thut a, a tui rawn invai-let saw a na em em mai a, saw sawn vibration nasa tak a siam thin a. Chumi lo ti zawi tur chuan valve vuah a ni a, mahse eng emaw lai atang khan Khatla-Chawnga road leh Bungkawn Tuikhur Veng chhungkaw eng emaw zat ten harsatna an tawh a. Inchung zawla buhfai bag han thlauh chawrh ang te, nghawr na tak-tak, an in tana hlauhawm an tawng ta fo mai a. Chumi buaipuiin kan deparment hruaitute pawh, an fel a, min enpui a, kan en hova, a valve a hlui tawh niin sawi a.

Khatla Veng Chawnga road leh Bungkawn Tuikhur Veng chhungkaw tam tak saw an in leh lo hlauhthawnawmin a awm a ni. Sawmi valve sawi thlak turin hma te pawh lak a ni a, hun rei tak atang khan buaipui a ni a, mahse vawiin thleng hian thlak ala ni lova. Engtikah nge min thlaksak theih ang? ‘Chhungkaw tam tak an mut a tuilo a ni’ tih kha ka han sawi belh a ni e. Ka lawm e.

SPEAKER : *Zawhbelhna* - Member zahawm tak Pu Lalrinsanga Ralte.

PU LALRINSANGA RALTE: Pu Speaker, ka lawm e. JJM hnuaiiah kei pawh kan bialah hma nasa taka lak a ni a, ‘kan lawm takzet a ni’ tih kha kan sawi hmasa duh a.

Kan PHE Minister hnena ka zawhbelhna chu hei hi a ni e -

Minister zahawm tak hi Vairengte lama kan party hruaitute leh kan Jt. VC te nen a office-ah kan sawipui tawh a, lehkha kan ziaak bawk a.

Vairengte khu khaw lian tak a ni a, vote pawh 7,000 chuang awmna a ni tawh a, an tui lak pawh an kham tawh lo viau mai a. Tin, CIJW te khuan an tui lak khu an tawm vek mai a. Tunah hian sorkar hmalakna zarah IR company headquarter-te din a ni chho leh dawn a, tui kan mamawhna a sang chho riau dawn a. Chuvangin Vairengte-ah hian tui lak tharna tur kan Minister-in ENC lamah pawh lehkha min ziah sak kan thehluh tawh te kha, hmalak zuina a awm em?

Tin, Bilkhawthlir pawh hi kan tui lakna a fuh vak lova. Kan tui lakna khu khaw chhung bawlhhlawh leh thli luannna hnuai lamah awmin a hmun a fuh lo deuh a. Khu khu hmun danga lak theih dan a awm em? Ruahmanna min siamsak thei ang em?

SPEAKER : *Zawhbelhna* - Pu Lawmawma Tochwawng, Member zahawm tak ka sawm e.

PU LAWMAWMA TOCHHAWNG: Pu Speaker, ka lawm e.

Tun sorkar kal meka tui lama hmalakna hi keini Lunglei East bial tan chuan lawmthu sawina tur tam tak a awm a. Khawpui pawn kuate chu tunah hian an kawtkaiah, a nih loh pawhin mahni inchhungah tui hnianghnar tak herh-hawa tlan an nei mek a ni. Hemi chungchangah a changtu Minister, kan Dy. Chief Minister ni bawk leh kan Chief Minister zahawm tak chungah lawmthu ka sawi a ni.

Pu Speaker, ka zawhna *Pakhatna* - Nikum budget session tawp lampangah khan Lunglei tui-tlan ber Pialthleng kawng siamna tur assurance kha min pe kha a ni a. Tunah hian engchen nge hma lak a nih tawh?

Pahnihna – Zobawk-Water Supply Scheme augmentation bul tan mek niin, hei hi special assistance nikum hmasa lama a changtu minister te'n duhsak taka ruahmanna min siamsak a ni a. Bul kan tan mek lain department pakhat nen harsatna kan tawh hlauh mai a. Chu kan harsatna chu min sutkian sak tur hian sorkarin a hma lamin hma min laksak thei ang em? tih tih te a ni e.

SPEAKER : Awle, a theih ang ang chhang turin Pu Tawnluia, Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, Pu Lawmawma Tochhawng, Member zahawm tak zawhna kha - Pialthleng, kalkawng, Lunglei tui-lakna kawngpu ber, a tirta atanga kan hman chu a bawl reng mai a. Timam turin department-in kan tlin si lova. Sum te kan dil thin a, mahse kan hmu mai thei lo a, hei chen kan nei lova.

Amaherawhchu kan Chief Minister zahawm takin he Session Hall-ah ngeiah hian member zahawm tak hnenah “kan ngaihtuah dawn nia” a ti a. Chutiang chuan tunah hian PWD-in Pialthleng kawng siam nan sanction hmuin hma an la nghal a. A figure kha ka hriatsual loh chuan crore 7 zet zawt a niin ka hria, Pu Speaker. Chu chu an tender a, tunah final stage-ah a awm a. Tun thal hian hna an tan thei dawn a, ‘a hlawhtling dawn e’ tih kha ka han sawi duh a ni e.

A dang lehah chuan, Pu Lawmawma Tochhawng, Member zahawm takin a sawi, Lunglei-Water Supply Scheme, hman lai, augmentation kan tih, a thuam phuisuina hna chungchangah khan a contractor te pawh kan lo nawr zui ang e. Chak taka an thawh theih nan kan lo enzui dawn nia.

Tin, Pu Lalrinsanga Ralte, Member zahawm tak, Serlui bialtu khan a bial chhung Vairengte leh Bilkhawthlir tui mamawh chungchang kha a sawi a; kan sawi thin a, ani pawhin a rawn thlen a. Hei hi kan budget thar atang hian eng emaw hmalak theih kan neih ringin ‘kan lo chhinchhiah e’ tih kha ka chhanna a ni a.

Tin, Aizawl West-III bialtuin pipe thlak chungchang kha - khalai kha tunah hian kan ngai pawimawh a. Kan sawi ang khan a scheme saw a rei tawh a, tui hi kan pump-in a force a chak khawp mai a, a in withdraw pheh chuan ri rum-rum khawpin ri te a nei thei a, a hre ngailo tan chuan hlauhawm takte pawh ni thei a ni a. Amaherawhchu, kan engineer te'n kha laia mi chengte tana hlauhawm leh hlauhawm lo hi englai pawhin an vil ve reng mai a. A bialtu zahawm takin a sawi, Khatla leh Bungkawng te, Maubawng thleng te pawhin a ni a, kalkawng dung leh chenna in bula pipe kal chungchang chu kan lo chhinchhiah ang a, enzui kan lo tum dawn a nia.

PU VL. ZAITHANZAMA: A pipe tha lo leh eng emaw lam kha a ni lova. Department hotute leh keimah telin kan en tawh a, a valve kha a hlui tawh a, ‘thlakna tur kan chah ang e’ an ti a. A valve that loh avangin a nghawr a na a ni. Ka hriat dan phei chuan an chah thleng tawh a, min thlaksak rang thei se kan va ti em. A pipe-a kha chu a la buai lo e.

PU TAWNLUIA, DEPUTY CHIEF MINISTER: Awle, kan lo bawhzui dawn nia. Kei aiin i hrechiang mah mah a; mahni bialte kan ngaihsak hi a lawmawm khawp mai. Zawttute’n information tha tak te min pe thei zel mai a, kan lawm khawp a ni.

Tin, Tawi Tlang atanga kan tui lak hi kan nghakhlel khawp a. Amaherawhchu kan hriat theuh angin, he scheme hi covid tuar pawl a ni a. An mi rawihte, vai rama mi 20-30 an ni a, covid lai khan a bibo lo thei si lova; anni a hnehin keini pawh kan bibo kha a ni a. Chuvang chuan, kumhnih chhung kha chu hmalak tak tak theihloh lai a awm a. Tunah hian tlemin an han chhonzawm leh takah hian an hna pawh hi a kal tha khawp a, an progress pawh a chhe lovin kan hria a. Hei hi kan tih puitlin hunah chuan Tawi Tlang atangin Aizawl-ah, chhim lamah sawn tui a lo luang thla ang a, ‘chhim lamah a tlan pha chin chuan kan tlan dawn a ni’ kan tih thina kha a ni e. Chu chu ka sawi chin ni rawh se. Ka lawm e.

SPEAKER : Starred Question No. 107 - zawt turin Dr. ZR Thiamsanga, Member zahawm tak ka sawm e.

DR. Z.R. THIAM SANGA: Pu Speaker, ka lawm e. Transport Minister zahawm tak chhan atana ka zawhna chu –

- a) Champhai-ah khian lirthei khu endikna (pollution test) hmun hi dah tumna a awm em?
- b) Dah tumna awmlo ni se, dah turin hma min laksak thei em? tihte a ni e.

SPEAKER : Chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MINISTER: Pu Speaker, ka lawm e. Member zahawm tak Dr. ZR Thiamsanga zawhna chhanna chu -

- a) Champhai-ah hian mamawhna a san tawh avangin sorkarin pollution test-na khawl dah turin hma a la a. Tunah hian dahfel a ni tawh e.
- b) Aizawl khawpui chhungah hian lirthei khu (pollution) test-na hi dahbelh tumna a awm a, tunah hian hmalak mek niin heng an dahbelh tur hi February thla chhungin hawn hman tum a ni.

SPEAKER : *Zawhbelhna* - Zawhna neitu Dr. ZR Thiamsanga.

DR. ZR. THIAMSANGA : Pu Speaker, ka zawhbelh duh chu – ‘District dangah te pollution test-na hi dah a ni ve em’ tih leh, ‘Champhai district Transport Office min rawn sak sak a, kan lawm khawp mai a. Khi khi engtikah nge zawh theih anih ang’ tih a ni e.

SPEAKER : *Zawhbelhna* - Member zahawmtak Pu Lalrindika Ralte.

PU LALRINDIKA RALTE: Pu Speaker ka lawm e. Ka zawhbelhna chu –
 i) Zampui tlangdung lamah bus service tir ni khan ka hria a, kha kha la kalpui zel a ni em’
 ii) Aizawl leh Kanhmun inkar hi bus service a awm em? A awmlo anih chuan, service turin hma min laksak thei ang em? tih a ni e.

SPEAKER : *Zawhbelhna* - Pu C. Ngunlianchunga.

PU C. NGUNLIANCHUNGA: Pu Speaker, ka lawm e. Ka han zawt thuai thuai ang e. Ka zawhbelhna chu -

i) Two-wheeler taxi permit pekchhuah anih atangin Aizawl-ah kum tin engzat nge pekchhuah anih?
 ii) Lawngtlai DTO Office kan Transport Minister zahawm takin a hawn tak bill ba kha engtikah nge pek theih a ni ang? tih a ni e.

SPEAKER : Awle, a theih ang ang chhang turin kan Minister zahawm tak Pu TJ Lalnuntluanga, a changtu minister ka sawm e.

PU TJ. LALNUNTLUANGA, MINISTER: Pu Speaker, zawhna neitu Pu ZR Thiamsanga zawhbelhna kha - Pollution test-na hmun hi District hrang hrang Siaha, Champhai, Kolasib, Lawngtlai, Serchhip, Mamit-ah te 2019 chho ah khan dah a ni tawh a. Tunah hian private-in Kolasib-ah hian ZDU te enkawl turin kan pe chhawng tawh bawk a. Tin, Champhai-ah pawh hian mimalah pek a ni tawh bawk a ni.

Tin, DTO Champhai-a Office sak hi kumin chho ah hian zawh hman kan tum a, tunah hian chak takin a thawktu te pawhin an thawk mek ani.

MLA zahawmtah Pu Lalrindika Ralte zawhna kha, hei tunah hian kalpui zui zel a ni a. Thawk khat lai khan kawng a chhiat avangin kan tlan thei lova, chawlh lailawk lai kha a awm a.

Tin, Aizawl - Kanhmun bus chungchang kha ka hriat chinah chuan a awm lo. Tuna sorkar hi ‘sumdawnnaah hian an inrawlh tur a ni lo’ tih ngaihdan lian tak a awm chho ta a. Tin, MST bus te hi kumtin budget session kan neihah hian ‘hloh department’

angin kan kal a ni ringawt mai thin a, a chhan chu, sorkar motor-ah hi chuan concession te a lo tam bawk a. Tunlaih private eizawna atan commercial vehicle lo kalpuite an awm deuh nual bawk nen hian, a hlawk lo bawk a, sorkar-in a hloh nasat avang hian. ‘Mimala bus lo service duh an awm chuan permit lo pek kha sorkar chuan a lo hawi ta zawk a ni’ tih kha kan chhanna ni sela. Khulam Kanhmun lamah pawh bus service tir te pawh an duh chuan, khang kha kalpui kan tum a ni.

Tin, helaia ka han sawi belh leh duh chu - District tlawhpawh tur kawng hrang hrang hi tunah hian laih mek a ni a. Heng kan laih zauh ho te hi a zo chho anih chuan, bus chuan nuam zawk company te nen pawn kan inbe mek a, ‘MST banner hnuuia tlantir turin kan inbuatsaih a ni’ tih kha ka chhanna ah ka han belh a ni e.

Tichuan, Lawngtlai West bialtu in a zawhna, “Aizawl khawpui chhunga two-wheeler taxi permit pek chhuah anih atangin kum tin engzat nge pek an nih?” tih kha - Kum tina pek a ni lova. 2022-2023 kumah khaan pek a ni lova, kan pek tawh china hian thalaite leh chhungkua eizawna neilote pek niin, tunah hian a vaiin mi 3,646 hnenah eizawna thar kan siamsak a ni tih kha kan chhanna a ni e.

SPEAKER : Awle, *Zawhna & Chhanna* hun zo a. Vawiinah hian .. (**Pu C. Ngunlianchunga**: ‘DTO office sak tawh bill ba kha engtikah nge pek theih a nih ang’ tih kha).. Nakinah in leng tawn mai rawh u aw; ka khar tawh e.

Minister zahawmtak Pu Robert Romawia Royte hi central sorkar te nen program pawimawh tak an nei a, tunah hian a absent a ni.

LAYING OF PAPERS

Awle, tunah chuan *Paper Lay* ah kan kal ang a, kan Chief Minister zahawmtak Pu Zoramthanga’n heng -

1. Report of Comptroller & Auditor General of India on Social, Economic & Revenue Sectors for the year ended 31st March, 2020;
2. Finance Account 2021-2022, Vol.I, Govt. of Mizoram;
3. Finance Account 2021-2022, Vol. II, Govt. of Mizoram;
4. Appropriation Account, 2021-2022, Govt. of Mizoram te hi House dawhkanah rawn lay se, ka sawm e.

PU ZORAMTHANGA, CHIEF MINISTER: Pu Speaker, i remtihna leh House phalna in, heng -

1. Report of Comptroller & Auditor General of India on Social, Economic & Revenue Sectors for the year ended 31st March, 2020;
2. Finance Account 2021-2022, Vol.I, Govt. of Mizoram;
3. Finance Account 2021-2022, Vol. II, Govt. of Mizoram;

4. Appropriation Account, 2021-2022, Govt. of Mizoram te hi he House dawhkanah hian ka rawn lay e.

FINANCIAL BUSINESS

SPEAKER : A copy kha sem ula. Hetah hian ‘Titi awihloh’ tih a inziak a ni. Kan chang kim em?

Tunah chuan Financial Business-ah kan kal ang a. Kan Chief Minister zahawm tak Pu Zoramthanga’n Ni 13.2.2023, (Thawhtanni) a budget a pharh tak “The Annual Budget for the year 2023-2024” kha *General Discussion* kan nei ang a. Kan hriat tlan angin, Ni 2 sawihona kan nei dawn a, Ni 21.2.2023 (Thawhlejni) ah general discussion hi zawh kan tum ang.

Awle, membrete minute engzatnge kan inpek ang le? Ni 2 kan nei a, *minute-10* hi tih dan tlangpui a ni a, minute 10 ti leh mai ang aw? (*House-in a remti a..*) Tunge han sawi hmasa ber ang le? Han sawi teh u, hun hi a uiawm viau zel ania; zan men rei loh a tha. Tunge han tlawmngai thei le? Awle, Member zahawm tak Dr. F. Lalnunmawia ka sawm e.

DR. F. LALNUNMAWIA : Pu Speaker ka lawm e.

Tun tum hi Pu Speaker, Covid-19 kiam hnua budget pharh leh hmasak ber anih rualin tun sorkar term chhunga kan budget hnuhnung ber a lo ni ta reng mai a. Dam taka member zawng zawngte, vawiin kan thleng thei hi Pathian hnenah lawmthu ka sawi a ni.

Awle, kum 2020 leh 2021 chhunga kan hun tawnte kan thlir let chuan Pu Speaker, kum 2 zet mai Covid hrileng avanga kan mangan zia te, tin, hrileng donaa sorkar, kohhran leh tlawmngai pawl tangho ‘Task Force’ ten theihtawp an chhuah tlan zia te ka mitthlaah a lo lang a. Chutih rual chuan Pu Speaker, central sorkar atanga Mizoram-in sum hmuh kan beisei zat kan hmuh loh zia te, tin, kan hmuh chhun atanga hrileng donaa sum kan sen nasat zia te kha kan la hre theuhin ka ring a ni. Chutih laiin thenkhat ten tun kan sorkar hnathawh leh hmalakna te hi hrilen loh lai, ti mai ila, hun pangngai sorkar nen min khaikhin ti-tih fo niin a lang a. Hrileng kara kan harsatzia te kha Pu Speaker, kan ngaihtuah let chuan sorkar term dang nena khaikhin chi niin ka hre lova, kan dinhmun kha a inthlau em mai a. Engpawh ni se, kan CM kaihhruaina hnuaiah sorkarin theihtawp a chhuah a, budget theih ang tawkin a han buatsaih a. Tun tumah pawh hian kan CM zahawm tak leh Finance changtu te bakah finance lama mithiam ten theihtawp chhuaha an duan budget hi a tha khat hle ang tih ka ring a ni.

Tin, Pu Speaker, a hmasa lama sawilan ka duh chu - sorkar loan lak chungchang hi tunlai titi siamtu zinga pakhat anih vangin han sawi hmasak ka duh a. Hei budget speech-a kan hmuh ang khan sorkar kum thar 2023-2024 atana financial institution

hrang hranga sorkarin loan puk tura a ruahman hi cheng vaibelchhe 2,479 a ni a. Chungte chu kan hmuh angin market loan - NABARD loan te, tin, NCDC, REC leh PFC loan te bakah RBI in a tul bik hun atana min phalsak 'ways & means advance' te an ni a. Tin, heng loan lak tur te hi kumtin budget-ah tarlan thin a ni a, chu chu capital receipt-a kan hmuh kha a ni. Pu Speaker, tun sorkar kal lai mekah pawh hian loan chi hrang-hrang puk a ni a, kum kal lai meka loan lak tur budget-a kan pass tak kha cheng vaibelchhe 2,429 a ni a, tlemin kumin kumthar aiin a tlem deuh hlek a. Chutiang chuan budget a kan pass ang khan sorkarin loan a la a.

He laia ka han tarlan duh chu, Pu Speaker, thenkhatin sorkar chu sum puk uar lutuk leh, tidiklo ang hiala ngaih theih turin social media-ah te an vawrhdarhin ka hria a. Tin, chanchinbu front page-ah te hial, 'sorkarin loan a puk leh ta,' tia chhuah te pawh a awm a. Hei hi thudik chanve hmanga mipui rilru hruai kawi tumna a ni deuh te pawhin ka hria a ni. Chuvang chuan, sorkar sum puk hi budget-a pawh pass vek tawh, dan anga sorkar laipui leh RBI-in min phalsak chhung zelah kan puk a ni tih kan tarlang duh a ni.

Tin, Pu Speaker, Mizoram hi India State zingah leiba ngah ber pawl anga sawi a awm thin te pawh hi a dik lovin ka hria a. Kan hriat ang khan, PRS Legislative Research, New Delhi-in nikuma MLA te tana training a buatsaihah Mizoram chu 'leiba nei tlem ber zinga mi a ni' tih tarlan anih kha. Chuvang chuan, Pu Speaker, kan dinhmun hi State dangte khaikhinin leiba chungchangah chuan 'kan ba nasa lo a ni' tih hi vawiinah hian ka sawi duh a.

Tin, Pu Speaker, tute pawh sorkar sela, 'loan tel lo chuan sorkar a kal tak tak thei lo' tih hi kan hriatthiam vek ka ring. Tin, tul bik huna sorkar mamawh phuhruk nana loan hun reilote chhung atana RBI atanga puk a phal thin 'Ways & Means Advance' te pawh kan la thin a, mahse kan sorkar hian a hun chhungin a rul thei zel lai te pawh hi a lawmawm hlein ka hria a. Hengte pawh hi sorkar loan la ngun lutuk anga vawrhdarh te a awm a, amaherawhchu chu Pu Speaker, hetiang *advance* hi hun tiam chhunga rulh theihloh anih chuan 'overdraft' tih niin a pung nena rulh tur kha a ni a. Chu pawh chu kan la rul theilo cheu anih chuan, sorkar laipui atanga sum lo kal kha tihtawp tur niin, chu chu 'treasury khar' kan tih kha a ni a. He kan sorkar chhung hian Pu Speaker, chutiang thleng lovin a hun chhungah 'ways & means'....

SPEAKER : Ngawi rawh aw; Chair kan han inthlak lawk ang e.

(*Dy. Speaker zahawm takin Chair a la a..*)

DEPUTY SPEAKER : Awle, sawi chhunzawm rawh le.

DR. F. LALNUNMAWIA : He kan sorkar chhung hian treasury khar ngai lovin sorkarin *ways & means advance* a puk te pawh hun tiam chhunga rulh zel thei anih hi a

lawmin kan hria a. Kan CM leh kan finance hotute theihtawp chhuahna zarah sorkar hi mualpho lovin a la kal hram hram thei niin ka hria a, a lawmawm hle a ni.

Tin Pu Dy. Speaker, kan hriat angin harsatna hrang hrang - 15th Finance Commission rawtna angin kan sum hmuh zat te a tlem tial tial a. Tin, chumai bakah nikum khan sorkar laipui thu angin CSS fund cheng vaibelchhe 600 zet mai sorkar sum bawm atangin release an ni a. Heng harsatna hrang hrang karah hian sorkar hnathawk thla thar hlawh han pek zung zung te pawh harsatna kan han tawk ta deuh a ni a. Tun thlengin eng emaw harsatna kan la tawk a, engpawh ni se heng kan harsatna hrang hrang te hi chu kan inhriatthiam kha a tul hlein kan hria a ni.

Vawiin ka sawi duh chu – tu pawh sorkar se, tun ang hun harsa, central dan lo zawm tul nen, tun ang baka sum enkawl thiam ngaihna hi awm chuangin ka hrelo a ni. Pathian hruainain kan sorkar hian theihtawp a chhuah a, mualpho lova kan la kal hram hram thei hi Pu Dy. Speaker, a lawmawm em em zawkin ka hria a ni.

Tin, hei kumthat 2023-2024 budget-ah hian hmasawna hna thawhna tur *capital expenditure* hi 21.9% a ni a, hengte hi central sorkar atangin kan hmuh chhoh theih chuan, hrileng te a lo kiang ta bawk a, hmasawna hna pawh nasa zawkin kan thawh theih ngei ka beisei a. Chuvang chuan, bial hrang hrangah mipuite'n hmasawna kan hmu chhoh zel ka beisei a ni.

Tin, Pu Dy. Speaker, thil lawmawm tak chu - kan sorkar flagship programme - SEDP-ah cheng vaibelchhe 595 dah a ni a, hemi atanga vaibelchhe 300 chu kuthnathawtute fairel bel thleng tura dah a ni hi a lawmawm hlein ka hria. Kan hriat angin sorkar kum kal mekah chhungkaw 60,000 te hnenah cheng 50,000/- theuh pek tur a ni a, tin, sorkar kum tharah pek belh leh tura ruahman a ni te hi lawmawm ka ti a. Tin, heng chhungkaw 60,000 te bakah chhungkaw sing engemaw zat dang thlan thar tura ruahmanna siam a ni te hi kuthnathawktute tan thil lawmawm tak a niin ka hria a ni. Pu Dy Speaker, he family oriented SEDP-ah hian kuthnathawktu ten eizawna rahbi an tukna tura cheng nuai 3 thleng pek chhonzawm zel tura sorkarin ngaihtuahna a seng hi lawmawm ka ti hle a ni.

Ka han sawi leh duh chu - College fee chungchangah zirlaite ngenna ngaipawimawhin kan sorkarin college fee atanga sum luang kawm te college hmasawna atan cheng vaibelchhe 1.5 lai a dah hi thil lawmawm tak niin ka hre bawk a ni. Chuvangin, college te pawhin hmasawna an hmuh chhoh zel ka beisei a ni. Tin, SSA hnuaia hnathawktute hlawh pung pekna tur SMS ah hian cheng vaibelchhe 52.98 dah a nih bawk a. SSA hnuaia thawkte an hlawh pung an hmu chho ve thei tur hi ka lawmpui hle a ni. Chu bakah, All India Central Service beitute leh hemi atana inbuatsaih thalaite tan, an inbuatsaihna leh inchhawmdawl nan cheng nuai 50 dah a ni bawk a, tin,

a tul anga bek belh zel tura sorkarin ruahmanna a siam hi lawmawm ka ti a. Hei hi thalai lehkhah thiamte tan thil lawmawm tak niin ka hria a ni.

Tin, Mizoram Healthcare Scheme hnuaiah cheng vaibelchhe 50 zet dah a ni hi lawmawm ka ti a. He mi atang hian Healthcare Scheme hnuai bill tang tam tak chu pek theih an a beiseiawm a ni. Hei bakah hian sorkarin ADB loan a lak tur atang te in bill tang mangang tak tak te pek theih leh healthcare scheme changtlung zawk kan neih ka beisei a ni.

Ka khaikhawmna atan chun, 2023-2024 budget hi hmasawmna tam tak thawh theih nan a beiseiawm rualin, mi-rethei leh kut hnathawktute fairel bel thleng phak niin ka hria a. Chuvangin, mi-lian atanga mite ber thlengin budget hian a huap zo hlein ka hria a. Mi-rethei te leh mi-vantlang nawlpui ten kawng hrang hrangin hmasawmna hmel an hmuh ngei ka beisei a ni. Chuvangin, hetiang Budget tha, kan CM zahawm tak leh finance lama mithiamte'n an han buatsaih hi a ropui ka ti a, hei hian Mizoram hmel thar min hmuhtir ka beisei a. Kum tharah chuan hri leng te a lo ziaawm ta bawk a, bial hrang hrang leh district hrang hrangah hmasawmna nasa zawk kan hmu chhoh ngei ka beisei a ni. Tichuan, he budget-ah hian, 'beiseina sang tak ka nei a ni' tih kha ka han sawi duh a ni e. Ka lawm e.

DEPUTY SPEAKER : Tunge sawi leh ang le? Dar 1 hi kan chawlh hun kha a ni a; dar 12 a la ri lo deuh a. Sawi tur kan awm loh chuan chawlh mai a ngai dawn a. Awle, Member zahawm tak Pu C. Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e.

A hmasa bera ka sawi duh chu - kum 5 chhung budget speech buatsaihnaah kan Chief Minister zahawm tak, Finance changtu hian Budget hriat awlsam tak zawngin a rawn pharh thin a, a fakawm hle a, lawmthu ka sawi a ni.

Kum 2023-24 Budget hi Budget speech bu hrang hrangte leh Demand for Grants bu nen theipatawpin ka han zir ve a. Kum 2023-24 budget pumpui hi cheng vaibeche 14,209.95 a ni dawn a. Kum 2022-23 budget hi cheng vaibelchhe 14,008.15 niin cheng vaibelchhe 201.08 in a pung a. 2023-24 hian leiba cheng vaibelchhe 13,584.08 ni tura chhut a ni thung a ni.

Thlirna tlang dang atangin he lai hi han thlir ka duh a. Kum 2023-24 budget pumpui cheng vaibeche 14,209.95 atang hian leiba cheng vaibelchhe 13,584.08 hi tuna rulh ngei ngei ngai ni ta se, kum thara pawisa hman tur kan neih hi cheng vaibelchhe 625.15 chauh a ni dawn a ni. Eng pawh ni se, kan budget pumpui leh kum thara leiba kan rulh tur inkar hi a zim hle mai a. State rethei leh harsa kan nih tawh naka lain, leiba

rit pui nen kumin hi kan kal chho dawn a ni a, a huphurhawmin a harsa hle dawn a, kan rethei hle dawn ni te pawhin a ngaih theih a ni.

Fiscal Responsibility and Budget Management Act, 2006 in kan ram hmasawna tehna bul atana a hman chu GSDP a ni a, chu chu kan deh chhuah zawng zawng hi a ni a. Kum 4 chhunga kan than dan FRBM-a ziahlan anih dan chuan –

Kum	Actual (in percent)
2019-20	19.66
2020-21	9.71
2021-22	-11.28
2022-23	-9.01

Heta tanga chiang taka lang chu, kan ram hmasawn dan hi ‘a hnungtawlh zawngin kan kal’ a tih loh theihloh a ni. A chhan chu, kumin hian 9.01% Budget Esetimate a ni a, chu chu, ‘zero pawh kan pha lo’ tihna ang a ni a. Thil chiang tak chu, Mizoram chu lu lian-pui nei, mahni kut-ke a ding thei lo, kal thei lo, thang thei lo, ‘hmasawna dika hmasawna nei lo’ tih hi zep rual a ni lova. He ta tang hian chiang takin a lo lang a ni.

Ka han sawi leh duh chu, ‘Revenue Receipt’ lam hi. Kan Revenue Receipt, kan inrenbawlna atana sum kan hmuh tur hi cheng vaibelchhe 11,486.63 a ni a. Heta sum hmuhna tura kan beisei chu *State-owned tax* revenue te, *State-owned non-tax* revenue atang te, sorkar laipui nena chhiah kan insem tur *share of taxes* atang te, *grant-in-aid* atang te leh *contribution* atang tein a ni hlawm a ni. Kan dinhmun enin heta tanga chiang taka lo lang ka han tarlan duh chu, owned-tax revenue - lirthei atanga chhiah lo lut te, in-lo-ram chhiah leh a dangte hi kan tihpun a ngai dawn a, *mipuiin phurrit tak an phur belh dawn* tihna a ni. Tin non-tax revenue lamah pawh hian - tui bill leh electric bill kum tina pung ziah thin pawh kha tihpun belh a lo ngai leh dawn ta a ni. Hei hi mipui tan phurrit a tling a, a pawh hle a ni.

Tin, Capital Receipt-ah hian han lut leh ta ila. Kum 2023-24 chhunga sum hmuh tur hi cheng vaibelchhe 2,723.32 a ni a, chu chu loan puk atanga kan hmuh tur, kan laklul tur a ni a. RBI atang te, multi-lateral bank, financial institution hrang hrang atanga puk tur chiang sa a ni a. Tin, hemi bakah hian co-operative society te leh sorkar hnathawkte hnena loan pek, a pung an rulh lehnatur nen, chungte chu capital receipt hian a huam dawn a ni. Chuti anih chuan, state kan nih hnu kum 36 chhung hian keimahni hian deh-chhuah, siam-chhuah leh thar-chhuah ‘pakhatmah kan la neilo’ tih hi thuchiang a ni a, a pawh hle a ni.

Tin, disbursement - pawisa hmanna tur ruahmanna lamah han lut leh ta ila. Kum 2023-24 chhunga revenue expenditure hnuaiia sum hman tura ruahman kha cheng

vaibelchhe 11,068.76 a ni a, chu chu budget pumpui atangin 78.10% a ni. Tin cheng vaibelchhe 417.87 hi estimate atang hian hman bang awm tura chhut a ni a. Amaherawhchu, thil chiang tak chu, sorkar revenue expenditure hi sum hmanna tur chiang sa, sorkar inrelbawlna hrang-hranga hman tur a ni a, hmasawanna hna thawhna hei hian a huam tel lo a ni. Tin, ram hmasawanna thawhna tur capital expenditure atana sum ruahman hi vaibelchhe 3141.19 a ni thung a, hei hi kan ram tana assets siamna tur, hmasawanna hna kan thawhna tur a ni a. Tichuan, Revenue expenditure lam leh capital expenditure han en hian ram hmasawanna hna thawhna tura pawisa hi a tlem em em a ni. Kan budget hi heta tang ringawt pawh hian ‘budget tha’ a tih ngam dawn em ni?

Tin, Sectoral Allocation lampang hi tawitein han sawi leh ka duh a. General Services Sector-ah hian *Capital Section*-ah vaibelchhe 1147; Social Services Sector-ah *Capital Section*-ah hian vaibelchhe 467.35; Economic Services Sector atan *Capital Section*-ah vaibelchhe 82.33 te hi budget speech-ah hian alo lang a. Amaherawhchu, *Demand for Grant, 2023-24* han en ila, department budget allocation-a capital section-ah hengte hi alang hauh si lova, ‘hengte hi khawiah nge dah a nih’ tih kha min hrilhfiah turin ka ngen a. Assets siamnana hnathawhna tur capital section-a pawisa dah budget speech-a sawi te hi *Demand for Grant, 2023-2024* bupuih hian a awm si lova, ‘hei hi khawiah nge a awm’ tih hi ka zawhna a ni a, minrawn chhan fiah pawh ka beisei.

Tin, Finance bikah hian *Other Charges* atan cheng nuai 22,279.25 dah a ni a, ‘*Other Charges* atana heti zat pawisa dah a ni hi eng atana hman tur nge’ tih min hrilhfiah turin ka beisei bawk a. Tin, heti zat pawisa *Other Charges*-a dah a ni hi ‘a ruka dahthat a ang mang e aw’ ka ti a, a tam hle si a. ADB atanga loan la lovin Healthcare a pawisa ba rullhna atan te, sorkar hnathawk pension benefit pek atan te, tin, sorkar hnathawk te pawh an hlawh a hunbi-ah kan pe thei lova, chungatan te chuan hman theih ni zawk sela a tangkai hle tur niah ka ngai a ni. Tichuan, SEDP atana cheng vaibelchhe 595 awm pawh hi... (**Dy. Speaker:** I zo thei dawn tawh em?) Pu Dy. Speaker, ka zo tep e; a hmawr ka bawk tak tak tawh a ni. (**Dy. Speaker:** Zo tawh rawh le.) Hei pawh hi Finance Department-ah hian a hlawmin a awm tawp mai bawk a. Department allocation hi han en ila -SEDP hi a *blank* deuh vek a ni. Tin, cheng vaibelchhe 25 SEDP (untied) a dah pawh hi enga tana hman tur nge? ‘Nuam tawlina tur a ang’ a tih theih a.

Chuvang chuan, wawiinniah hian Pu Dy. Speaker, ka sawi duh chu - kan system hi her danglam tum ang u; i thlak danglam ang u; system thar, kalphung thar nena kan ram hi kan kaihhruai a hun tawh; kal dan ngai ringawta kal hian hmasawanna hmuh tur a awm tawh lova, Zoram mipuite pawh hian an kham tawh a ni. Chuvang chuan, kan system hi i her danglam ang u; ‘kalphung thar mumal tak, awmze neiin i kal ang u’ tih hi Pu Dy. Speaker, wawiinniah hian ka sawi duh a ni. Ka lawm e.

DEPUTY SPEAKER : Hun i pel thui deuh hlek a ni maw. Aw le, Sawi tur kan la awm em? Kan awmluh chuan chawlh mai a ngai dawn a, hun a la tam bawk si

a..... Sawi tur kan awm tawh loh chuan kan chawl tawh mai dawn em ni? Kan hun pangngai chu ala thleng lova, enge House ngaihdan? Aw le, kan chawl ang a, chawhnu dar 2:00 ah kan sawi chhunzawm leh dawn nia. Tun atan chuan kan chawl phawt ang.

Recess (12:08 PM)

2:00 PM

DEPUTY SPEAKER : Budget sawihona hun kan tan leh tawh ang a. Tunge sawi hmasa ber ang le? Awle, Member zahawm tak Pu Lawmawma Tochwawng ka sawm e.

PU LAWMAWMA TOCHHAWNG: Pu Dy. Speaker, ka lawm e. A tawpah tih tawh a awm tih kan nghak tlang deuh nge ni kan in kian deuh duak a.

Pu Dy. Speaker, Covid hri-chhia in min tlakbuak avanga kan ram in sum lam dinhmunah leh kawng hranga harsatna, a khirh zawnga min nanchin lai meka budget puitling kan han pharh thei hi a lawmawm hranpa ve hrim hrimin ka hria a. A buatsaihtu kan Finance Minister, Chief Minister ni bawh leh department te an fakawm khawpin ka hria.

Kumin 2023 - 2024 a ram mipuite hman tur sum ruahman budget cheng vaibelchhe 14,209.95 hi duhthusam a ni kher lo mai thei a. Mahse ruahmanna fel tak enkawl na tha tak hnuai a hman a nih chuan, hmasawna leh changkanna kawng eng emaw chen hmalam pan tura ke min pen tirtu a nih ka beisei tlat a ni. A tam leh a tlem lam ai mahin a hun taka hman a niha, a hmanna tur taka hman anih hian kawngro a su fo thinin ka hria.

Budget Estimate-a lo lang SEDP-family oriented atan cheng vaibelchhe 300, counterpart-funding cheng vaibelchhe 220, healthcare vaibelchhe 50, SEDP (untied fund) vaibelchhe 25, a vaiin vaibelchhe 595 lo lang te hian, SEDP a kal zel dawn a, 'beisei tur a awm a ni' tih a tilang chiangin ka hria a, mipui tan pawh hei hi lo hriat tlan a tha awm e. Finance Commission in sum min recommend tam lo chung pawh a kan mamawh tak mipui-pual liau-liau, rethei leh mamawhte thleng phak ngei tura ruahman a ni hian, 'sorkarin ram mipuite a hmangaih a ni' tih a lan tir a, 'mipui-budget a ni' tih loh theih a ni lo a ni. Sum harsa tak chung pawha counterpart funding State matching share atana kum hmasa lam aia tam cheng vaibelchhe 220 lo lang hian Centrally Sponsored Scheme (CSS) atangin sum tam zawh Mizoram-in a hnuhchhuah theih a beisei awm a, ram tana budget chenfakawm tak hei hian a thlen ka beisei hle a ni.

Kan GSDP in min phalsak china him dam taka loan puk tur ruahmanna siam a ni hi, budget fing tak, chhungkaw tana pa berin thiam taka a ruahmanna fel tak a siam

ang mai hi a ni. Tunhma a budget a specific taka dah ni ngai lo - National Green Tribunal te, Samagra Shiksha hnuaiah te, PMGSY atan tea *dedicated fund* budget estimate-a dah a ni hian kan budget hi *ar-khawthim-dai* ni lovin, hmalam thlir nei chung a buatsaih a nih zia a tarlang hle a ni.

Tin, Pu Dy. Speaker, tun sorkar kum kal laia Lunglei Municipal hawn a ni hi chhinchhiah tlak leh lawmawm tak a ni a, tun sorkar kumthar lo awm turah a bul tanna atana cheng vaibelchhe 1.28 hi beitham deuh angin lang mahse, a tawpna tur a ni dawn lova, a bul tanna tur chauh anih avangin, thil chhinchhiah tlak a ni a, a lawmawm tiuteu viau mai. Tin, BDO Office thar pahnih hawn zingah Tlabung Block, Lunglei Dist. in kan chang ve hi a lawmawm khawp mai; a ram pumin kan chhawr phak hial ka beisei a, sorkar kumtharah hian a hma thei ang bera function ni se a duhawm khawp mai.

Tin, ram mipuiin tangkai leh rualkhai taka kan hman thin MLA-Local Area Development Fund atana cheng vaibelchhe 60 dah leh a ni hi mipui tan chanchin-tha a tlingin ka hria. A tel lova kan awm theihloh tui lam hnianghnar zawka kan neihna tura sum tam zawk dah a ni te, power supply tam zawk tana pawisa dah belh a ni te leh ram mipuite tam lova buh eitur leina tur pawisa dahbelh a ni te hian, sorkarin mipuite a ngaihpawimawh zia tarlangtu a ni a. Mipui lam hawi, ‘mipui-budget a ni e’ kan ti thei ang.

Pu Dy. Speaker, budget leh kan pawisa dawn leh hman thinah hian a let leh lampang tam thei ang ber hi dah thei tawh se a itawm hlein ka hria. Fur laia malsawm ruahtui tam tak kan dawn thin khawlkhawm lova a luang liam hum hum, thal a lo ni a tui leina tura sum kan han seng leh teuh thin ang chi te hi; hetiang ni lova a khawlkhawm zawng, sum let leh hmu thei zawnga budget kan siam zel hi kan ram tan kan thatna tur anih ka beisei a ni.

Hemi kan budget kal lai piahah hian tlem te a han pen lawk ka duh a. Kan ram budget, Mizoram a sorkarna siama budget pharh tawh zawng zawng hian hnungtawlh lam aiin hmalam min la pan tir zel ni hian ka hre thin. Entirna tlem te han sawi ta ila – tui tin hnih kawt haw tura tuikang nghakin zan khaw tairek reng-renga kan khawsa thin te, zing khawvar hmaa laltin nena tui chawi tura kan inkawt chhuak dawr dawr thin te kha hmanni lawk a ni. Tunah chuan khawpui leh thingtlangah mahni in chhungah kan herh-haw ta mai chu a ni a! Meipui chheh en leh diesel- khawnvartui ringa, bati leh laltin eng hnuaia lehkha zir thin kha kan ni a. Tunah erawh chuan kan han hmet khap a, electric eng hnuaiah lehkha zirin kan chhiar mawlh mawlh thei ta a nih hi. Lunglei leh Aizawl kal nana bangla tina riak zelin, a thlaa thla dawn mai hun kan hmang thin te kha, tunah chuan a darkar biin kan chhiar ta a. Healthcare, hriselna lam kawngah lah chuan APC, Anacin leh mum-uk te ring mai thin kha kan ni a, tuna kan dinhmun nen chuan khaikhin chi pawh niin a lang lo. Insukherh leh insuknawr, inbuan-inbin bak sports lama item discipline nei mang lovin tunah chuan khawvelah a-ber nihna te kan han kai a, kan

han hauh ve ta mai te hi! Pu Dy. Speaker tunah chuan sawisen a ni lova, heng zawng zawngte hi Mizoram-a sorkarna lo chelh tawh Mizo politician, Legislator ten budget an pharh thin te kaltlanga Mizo mipui ten kan dawn leh kan chan mek a ni a, ‘a va lawmawm em’ tih loh rual a ni lo. Tun budget chauh ni lovin, budget kal tawh zawng zawngte kha tun hun min thlen tu hi an ni si a. ‘Kan famkim ta e’ pheih zawng kan ti hauh lo. A chuti lova nu-ancheh, pa-ancheh tak ang maia kan ram siamna tur budget te kan han sel bawih-bawih a, a hman a lo huna hmang ve leh duh tho si te pawh hi awm theih a ni awm e.

Chubakah, kan zavai mai - ruling pawh, opposition te pawh hian mahni legislator puite, kan politician puite, *ar-chuk tui lo* leh *ui-ek pawh pu tlak lova* inchhuah a, inpuhmawh kan nih chuan kan inti thangtlawm a, mipuiin rinna kan chungah an hloh a; Dan siamtu pawlte zuamawmin kan insiam mai a ni. Kan inngaihtuah chian a ngai viauin ka ring. He House chhunga kan thusawi duh dan leh kan inchhuah duh dan atang te pawh hian, *mahni chungah meiling khawlkhawm ang* lekin kan inchhuah thin niin ka hria. Bansa a va hun tak em! Chutilo chuan, he ram roreltu pawlte hi tutein nge ngaisang chuang anga, an thu leh hla te tuin nge zawm tlakah ngai ang? Keimahni leh keimahni hi, hawh u, i intichhe tawn lo ang u khai. ‘Kan dik vek e’ zawng kan ti lo; kan dik-lohna, kan fel-lohna, kan tlin-lohna, corruption-ah emaw a awm anih chuan, chungte chu thudang a ni. Amaherawhchu kan chanchin kan insawi chhuah dan, kan chanchin kan intarchhuah sak dan atang hi chuan, he kan budget session neih lai hi chuan fimkhur takin kan hun te hmang turin kan han insawm ve a ni.

Engpawh nisela, he budget 2013-2014 pawh hi a hman huna hmang duh tur zawng zawngte chuan lawm taka kan pawm theilo anih pawhin, iai deuh chung pawhin i pawmin, ‘i pass ang u khai’, tiin ka han insawmin ka han ngen a ni e. Ka lawm e.

DEPUTY SPEAKER : Hun a hmang dik hle mai. Midang tunge sawi leh ang? Awle, Pu Lalrinsanga Ralte, Member zahawm tak ka sawm e.

PU LALRINSANGA RALTE: Pu Dy. Speaker, ka lawm e.

Hei general discussion hi nihnih kan nei thin a. Ni-khatnaah hian kan innghak deuh a, ni-hnihnaah hian kan bei leh vak mai thin si a. Chuvang chuan, kum dang zelah pawh ni-khat hi a tawh viau lo em maw ni le? I vei lama thute hian a tawp lam hi an ngak nge ka hre lova. Nichinah minrawn ngen a, “mi pahnihin sawi ula, keini pakhatin kan sawi leh ang a” anrawn ti a, ka sawi zawhah leh lamin an sawi turah ngai ila a tha awm e.

Pu Dy. Speaker, 8th Legislative Assembly atana budget hnuhnung ber kan lo pharh ta reng mai a, budget session kan neih tawhte thlir kira ka han ngaihtuah let hian,

hun harsa tak kara hruaitu-ropui, hruaitu-tha leh hruaitu-zuitlak kan nei niin ka hria a, tin finance enkawl tlak Chief Minister kan nei hi a ropui hlein ka hria a ni.

Kan hre vek a, khawvel ram zawng zawng natna hri Covid-in min tibuai a, India ram a tal-buai a, Mizoram pawh kan tal-buai a nih kha. Kum hnih chhung deuh thaw school kal thei lovin, biakin pawh khar a ni a, chutianga harsatna chi hrang-hrang tawk chungin vawiinniah chuan kan budget hi ‘a aia tha, tun ang dinhmunah a awm chuang lo ang a’ tih tur kan han pharh thei hi, kan finance minister leh finance enkawltute an ropuiin, an fakawm hlein ka hria a ni.

Pu Dy. Speaker, hei budget speech kan han en hian thil ropui tak tak mai kan han hmu a. A bik takin All India Service leh Central Service-ah kan thalaite an luh theihna turin cheng nuai ₹50 dah a ni hi a ropui hlein ka hria a, hemi hi a tul anga hman chhoh zel leh dah-belh zel theih tur a ni te hi ropui ka ti a. Vawiin niah hian khawvelah a ni emaw, India ramah emaw thalaiten hma an sawn a, thalaite kan rawn in-up chhoh zel theihna tura ram hruaitu ten thalai lam hawia ngaihtuahna sen hi a ni deuh vek tawh a, chutiang chuan Mizoram-ah pawh kan budget-ah te han tihlan a ni hi a ropui hlein ka hria. Hei hi a hminga dah mai a ni a, a tul anih phawt chuan All India Service leh Central Service-a kan thalaite tam tak an luh theihna tur hian sum hi ui lovin ‘dah belh chhoh zel ni se’ tih kha ka han sawi duh a ni.

Tin, Pu Dy. Speaker, sawi tawh ang khan hun harsa kan tawng a, kan sorkar pawh kan tal-buai hle a ni. Chuti chung chuan thil ropui deuh mai budget speech-ah hian a langin ka hria a. Rural Development department mumal taka a kal theihna turin sorkarin hmalakna ropui tak an nei chho hi ropuiin ka hria. Central sorkarin DRDA a rawn enkawl chhonzawm thei lova, chu chu State sorkarin DRDO-ah hlangkaiin ruahmanna a han kalpui a, tin, BDO block pahnih an han hawng chho thei te hi a ropui hlein ka hre bawk a. Hengte hi chak zawka anihna ang tura a kal chhoh theih zel hi beisei ila.

Tin, Pu Dy. Speaker, bawhlhlah sawngbawlna tura tan vaibelchhe ₹50.45 vaibelchhe lai mai dah a ni hi a ropui hlein ka hria a, ram changkang leh changkang lo tehna pakhat chu - kan hnawm te, ning-nawi leh bawhlhlah kan sawngbawl danah hian a langin ka hria a. Tin, Mizoram hian hmasawanna tur kan la ngah hlein ka hria. Plastic tawih theilo te ram leilungin a tuar nasa em em a, hengte hi inzirtirna kan inpek uar a la tul hlein ka hria a. He laia han sawi tel ka duh chu – Bilkhawthlir-ah khuan kuhva kawr atanga plate chi hrang hrang leh fian siamna hi a awm a, hei hi a changkangin vawihnih-vawithum hman nawn theih a la ni a, heng lamah te hian kan hawi tam a tha hlein ka hria.

Tin, *family-oriented* SEDP-ah vaibelchhe ₹300 lai mai dah a ni leh te hi a tha hlein ka hria a. Pu Dy. Speaker, he thilah hian tuna SEDP-chhungkaw sing-rukin an han dawng a, kan ti theilo tura ngaih anih laiin Finance Minister-in theihtawp chhuaha hma

lain chhungkaw sing-ruk hnenah cheng ₹50,000/- first installment a han kal chho a ni a, tun March thla chhung hian ₹25,000/- an account-ah a lut dawn a ni a. Tin, hmannah kan ngaihthlak tawh angin, SEDP tuna first phase ten 3rd installment an dawng leh tura ruahhmanna kal te, tin, 2nd phase thlan leh anih theihna tura heti zat sum kan han dah leh thei te hi a lawmawm hlein ka hria. Tin, healthcare scheme atan vaibelchhe ₹50 SEDP hnuai dah a ni te hi a lawmawm takzetin ka hria a ni.

Pu Dy. Speaker, hei fiscal policy duan hrang-hrang chungchang hi tlem han sawi tel ve ka duh a. Kan sawi fo tawh angin central-in pawisa min pek hi a kum telin hun hmasa lam te ai khan a rawn tlahniam zel ta si a, chuti chung chuan kan mamawh leh inrelbawlna te kalpui ngei-ngei ngai a lo awm si a, heti chung revenue surplus kan la nei thei hi a lawmawm hlein ka hria a, FRBM statement form-IIB outcome indicator leh form-III kan en chuan chiang takin kan hmu thei awm e. Kum 2021-2022 actual-ah khan revenue surplus vaibelchhe ₹602.25 kan nei a, chu chu GSDP atanga tehin 2.33% lai a ni pha a ni. Tin, 2022-2023 RE-ah pawh ₹603.05 lai revenue surplus kan han nei leh thei te hi, finance minister-in sum leh pai enkawl a thiam zia alang hlein ka hria a, ropui ka ti takzet a ni.

Tin, Pu Dy. Speaker, *state-owned tax* leh *non-tax revenue* a lo pung chho hi a ropui hlein, hei hian state puitling ni tura kan kawng zawh a tidik chho viau niin ka hria. Mihring kan pung chho zel a, mamawh kan ngah chho zel a, chutih laiin central atangin kan pawisa hmuh a tlahniam zel ta si a, churang chuan, hetiang dinhmuna kan din laia budget kan han hmu thei hi a lawmawmin ka hre tak zet a ni. Tin, hei, thil lawmawm tak mai kan han hmu nual a, budget discussion hmasaah pawh khan ka sawi tawh a. “Mizoram Resource Mobilization Committee-in hma a lak nasat phawt chuan hei hian kan ram sum leh pai dinhmunah pawh nghawng a nei ang a, kan sorkar tan pawh a tha ang” tih te kan sawi tawh a, vawiin-nia a hlawhtlinna rawn lang ta hi a lawmawm hlein ka hria. Mizoram Resource Mobilization Committee hnathawh a ropui takzetin ka hria a, fak an phu ka ti a. Committee thurawn anga department hrang hrangte bank account atanga a pung tlingkhawm vaibelchhe ₹35.74 zet Mizoram account-ah chhun luh a ni hi a lawmawm hle a, chhinchhiah tlaka niin ka hria a. Chuti ruala ka sawi tel duh chu – “Mizoram Resource Mobilization Committee hian nasa leh zualin tan la se, kum lo kal leh turah pawh kan sorkar hian hmasawna nasa tak kan hmuh theih ka ring” tih kha kan sawi tel duh hram a ni.

Tin Pu Dy. Speaker, kumin budget hi kum dang budget-te aia a ropuina chhan sawi tur a awm nual mai a. Mizoram NGO hrang-hrangte hmalakna tur leh khawtlang inrelbawlna leh an rawngbawlna tur a tihchak zualna tur nuai ₹50 lai mai dah a ni hi a lawmawm hle mai a. Nichina kan sawi - thalaite tan Central leh All-India service a inziahtlin leh kan luh tam theihna tura pawisa dah ang chi ah khan, a tul anih chuan hei pawh hi pek belh zel thei turah ka ngai a, a lawmawm hlein ka hria a ni.

Tin, Pu Dy. Speaker, Lunglei Municipal Council din-thar a ni hi a lawmawm hlein ka hre bawk a. Hei hi MNF election manifesto-ah ziah-lan a ni a, ziah a nihna anga hma laa a puitling chho thei hi a ropui hlein ka hria a. Chumi atana nuai ₹128 lai mai an inenkawl na tur sum dah a ni te hi a bul tanna turah chuan a lawmawm viauin ka hria a ni.

Tin, Covid hrileng leh palh-thut awm pawha invenna tur, emergency case awm pawha lo invent-lawkna tur atan vaibelchhe ₹1 lai mai dah a ni te hi a lawmawm hle. Tin, Local Body Grant kan han beisei te, VC, Municipal Corporation te hmalakna tur ruahmanna pawisa kan nei chho leh nual dawn hi a lawmawm hle bawk.

School Education bikah pawh State-matching share a hrana dah a ni chho diat-diat te hi a lawmawm hlein ka hria a.

Vawiinah hian lawmthu sawina tur tam tak a awmin ka hria a Pu Dy. Speaker. Capital Expenditure, ram hmasawna ruhrel dinna tura vaibelchhe ₹3141.19 lai mai a awm hi a ropui ka ti a. Kan ram dinhmun kan hria a, kan ramah keimahni dehchhuah leh keimahni intodelh kan nih siloh avangin leh central pawisa ring kan la nih si avangin, heng development leh infrastructure tihna tur, ram ro tling siamna tura kan pawisa neih te hi a tlem emaw, a tam emaw dik tak leh fel taka ram leh hnam tana kan hman phawt chuan hei hian hmasawna ropui tak min thlen ka ring a ni.

Chuvang chuan he kan budget discussion-ah hian ka sawi duh chu - vawiinah hian roreltu a ngai reng he House-ah hian kan thu reng dawn lova kan thut hun chhung hian 'engnge kan ram tan kan tih theih ang' tih hi ngaihtuah tlang theuh ila. He budget hi kan duhthusam ni lovin leh, kan duh ang tawk pawisa nei lo mah ila, vawiinah hian budget ropui tak, a hun chhung a harsatna leh buaina, natna hri kara kan budget atan chuan 'budget tha tak a ni e' tiin ka rawn support a ni e. Ka lawm e.

DEPUTY SPEAKER : Tunge sawi leh ang le? Ding lama mi leh vei lama mi insawichhawk ang an ti deuh niin ka hria a. Member zahawm tak Pu VL Zaithanzama ka sawm e.

PU VL. ZAITHANZAMA: Pu Dy. Speaker, ka lawm e. Mi-pathum tal kha chu ding sela kan intam hleih dan nen chuan a tawk vel a ni.

Awle, Pu Dy. Speaker, vawiinah kumin budget kan Finance Minister, kan House Leader ni bawkin felfai takin a rawn pharh a. Nikum ai khan a uluk emaw chu aw ka ti a. Han chhiar maia han pir tur tlem thei ang bera rawn duan ni hian ka hre deuh a.

Ka sawi hmasak duh chu - hnathawhna tur sum 'kan budget atanga a lan dan hian kan nei tam dawn em' tih hi ka sawi hmasa duh a ni. Capital Expenditure kha tlemin han luhkhung hmasa ta ila.

Hmasawwna ruhrel dinna tur capital expenditure atan vaibelchhe ₹3141 dah a ni a, kha kha budget pumpui atangin 22% tling lo hret kan dah a ni. Kumina kan leiba rulhna tur erawh chu vaibelchhe ₹1442 a ni a. Kan leiba te hi hmasawwna thawhna tur atana kan puk anih avangin capital expenditure atang bawk hian rulh a ngai a. Tichuan, vaibelchhe ₹3141 atanga kan leiba rulhna tur vaibelchhe ₹1442 kan paih chuan, vaibelchhe ₹1696 chauh a awm ta a ni. Ba rulhna tur hian hna a thawh theih siloh a, chuvang chuan, kan ba rulhna tur hi kan capital expenditure atang hian pawh-hek a ngai a ni. Tichuan, vaibelchhe ₹1696 anih chuan kan capital expenditure a tak taka kan hman tur chu kan budget pumpui atanga chhutin 11% vel chauh a lo ni ta a ni. 'A lan dan ang hnunglamah hian a tak ram a lo lang' ti ila a sual awm lo e. Vaibelchhe ₹1696 atang hian fet deuh ila chu a paih leh theih dan a la awm a. SEDP hi capital-ah kan book a, a tak takah chuan kan hman pawlh leh vek si a. Chuvang chuan, SEDP vaibelchhe ₹595 hi kan paih leh pheih chuan, a la bang chu vaibelchhe ₹1101 awrh hmasawwna thawhna tur a tak taka kan neih chu a ni ta a ni. Hman fimkhur leh uluk a ngai dawn hlein a lang a ni. Amaherawhchu, SEDP hi chu paih ta lo mai ila, paih tur a tam lutuk dawn a.

Tichuan, capital expenditure hi ka han en a, a titam tu ber chu leiba rulhna tur a ni hian lung a tichhia a ni. Vawiin thlengin kan la puk belh zel a, kan leiba rulh tur hi a pung telh telh dawn a. Kan capital expenditure hi nakin lawkah kan hman zawh mai a hlauhawm takzet a ni. Chuvangin, vawiin atang hian keini helaiia roreltute hian, kan sum neih hi a tam emaw, a tlem emaw kan hman fimkhur a ngai takzet a ni.

Power purchase-na atana vaibelchhe ₹400 kan dah hi lawmna tur nge tahna tur tih hi ka hrethiam chiah lova. Brig. T. Sailo kha power chungchang sawi hian a lung a chhe thin a, vawiin hian keipawh ka lung a chhe deuh a ni. Intodelha a hralhtu a tang hial tawh tura hmun leh hun nei tha si vawiinah vaibelchhe ₹400 zet mai dah a ngai ta hian min ti lunghnur hle a ni.

Hmanniah MLA zahawm tak Pu C. Lalsawivunga zawhna chhanna kan hmuhah khan Mizoram-in kan tuikhuah, kan State-ina hydel project te reuhte te kan enkawl ve 13 atangin kawlpheha megawatt 26.87 thar chhuak angin chhanna kha ka lo ngaithla a. Kan source a inan-loh vang nge, hetiang zat hi kan thar-chhuak lovin ka hre deuh a. A chhan chu - hetiang zat hi tharchhuak ila chu vaibelchhe 400 zet purchase-ah hian dah a ngaiin ka ring lova. Kan tharchhuak lo nia ka hriatna chhan tlem ka han sawi ang e, Pu Dy. Speaker.

Kan hydel project Mizoram sorkar-ina a enkawl zinga lian ve ber Serlui 'B' khu April atanga August, (thla 5 chhung) fur lai khan power pakhatmah a generate lo a ni.

Chuan Tlawva, Ni 11.8. 22-a commissioned khan December atangin power a pechhuak tawh lova. Ka hriat leh dan chuan, hei hi chu fur lai chauha power tlem-tlem pechhuak tur a ni awm e. Khatiang ho te-te kha siama kan enkawl reng si a sum tam tak sengin. Chuvang chuan, tul lovah sum kan hmang tam hle ni hian ka hria a.

Tin, Tuipui-Micro leh Tuirivang kha January atanga December, 2022 khan a *nil* tluanchhuak zak bawk a. Khati chung kha chuan kan report ngaihthlaka megawatt 26 chuang Mizoram-in a pechhuak anga tarlan a ni kha ka ringhlel deuh a, ka hrethiam lo hle a, ka han sawilang hram a ni. A tlangpuiin Mizoram-in a kan enkawl ve mini-hydel project ho atang hi chuan megawatt 10 vel hi kan tharchhuah dan tlangpui a ni a, kan kham lo tak zet a ni. Hmannia kan ngaihthlak ang khan, Serlui 'B' kha megawatt 11 pechhuak thin ang khan a lang a, mahse hei pawh hi a pechhuak ngai meuh lo a ni. Kha kha chu duh tawk leh mai ila.

Sum khawl kan thiam lo lai hi ka rilruah a lang a ni. State reserve fund kan nei mumal ta lova, *consolidated sinking fund*-ah hian kum tin kan total revenue expenditure atangin a tlem berah 0.5% tal RBI-ah dah tur a nih lain, kum 2019-2020 chhung khan kan dah lova, a hnu leh zelah kan dah lo mai ni lovin hripuiin min tihbuai tak avangin 2020-2021-ah vaibelchhe ₹226.65 kan lachhuak a. Tun kum kal mekah hian vaibelchhe ₹150 kan la chhuak leh a, tunah vaibelchhe ₹362.46 chauh a awm tawh a ni. Chuvang chuan, reserve fund dah-belh chu sawiloh, kan neih sa sorkar hmasain a lo dah khawl nge ka hre lova, kan hmang ta mawlh-mawlh a, 'kan dinhmun hi a awhawm loh hle a ni' tih kha ka han sawi duh a. Sum khawl kan thiam lova, tun atang chuan reserve fund lam hi kan ngaihpawimawh a hun takzet a ni.

Lawmna tur tam tak a awm a, ka hmaa mi khan an rawn sawi a. Amaherawh chu, lawm lohna tur pawh a tam a ni. Ei leh bara intodelh turin tan lak a ngaih teh lul nen agriculture leh horticulture-ah capital hmasawmna tur nuai ₹1 chauh kan han dah hian ei leh bara intodelh lam chu kan hawi rih dawn lo hian a lang deuh a. Chumai ni lovin, tunah hian Aizawl khawpui tui kan tlachham em em a, Phase-1 & II in min chawm zo tawh lova. Phase-III Tlawng atanga Laipuitlang-a pump chhohna tur SIPMIU-in a buaipui mek a, hei hi Sept. 2020 a zawh tur kha vawiin ni thlengin kan la zo lova. Chutih lai chuan a enkawltu ber SIPMIU-ho sum mamawh chu nikum khan nuai ₹9,674 dah a ni a, kuminah hian nuai ₹1 chauh dah a ni a; engtin nge Pu Dy. Speaker, hna an thawh ang le? An chhun thingpui inna velah a zawh mai a va hlauhawm ve maw le! Thawktu mi 37 lai an awm ve a, hna an zawh kan nghakhlel em em a. Chuvangin, a lem deuha hetiang thil dah hi fuh ka ti lo a ni.

Tin, 'kawngpui tha neih kan tum ta lo em ni' tih ka inzawt a. PWD budget kha 49.66% zet, a let dawnin a tlahniam a ni. Kuminah pawh kawngpui kan duh angin a tha lo a kan phun kan phun a, kan budget a let dawna kan tihtlak-hniam hnu hian 'engtin nge kawngpui tha neiin kan enkawl theih ang' tih min ngaihtuah tir a ni.

Chutih lai chuan sum thawkchhuaktu lian ber Taxation, Mizoram-a kan department sum thawkchhuaktu lian ber budget chu 3.76% in kan titla-hniam bawk a ‘thawhchhuah lam aiin hman lamah kan tui em maw ni chu aw’ tih min ngahtuah tir a ni. Ka han zo law-law ang e, Pu Dy. Speaker.

SEDP hi ka han sawi ve lawk ang a. Hmasawna ngelnghet a awm theih nan kan han ti a 2022-2023-ah vaibelchhia ₹350 *family-oriented* SEDP atan liau-liau dahfel a nih thu kan hmu a, chhungkaw 6000 hnenah ₹50,000/- sem tur a ni. Pu Dy. Speaker, ₹50,000/- hian hmasawna ngelnghet a awm thei dawn em ni? Hei aia tam deuh hian tih dan a awm lo em ni’ tih ka han sawi duh a ni.

‘Social Assistance to State for Capital Investment’ tih kha kan sawi ri zeuh-zeuh a. Covid hripui lengin kan sum lakluh te nasa taka a tih-tlakhniam phah avangin sorkar laipuiin ram hmasawna tura hnathawh nan minrawn pek a ni a. Kum 2021 khan vaibelchhe ₹200 kan dawng a, 2021-2022-ah vaibelchhe ₹300, kumin tun kum kal mekah vaibelchhe ₹497.50 kan dawng leh a ni. Hetiang khawpa tam hian hmasawna, (nichinah tlem chu Lunglei lama an thawh kan hria) hmasawna ruhrel lian pui-pui Mizoram-ah hian hmun hrang hrangah hmuh tur awm turah ka han ngai deuh hlek a. Tin, hei hi March thla chhunga hman zawh tur niin ka hria a, chumi anih phei chuan hmanhmawh a ngai hle.

Tin, hna lian cheng vaibelchhe 2 chung lama ... (**Dy. Speaker:** Duhtawk dawn tawh rawh le) thawh tur niin ka hre leh nghal a. Chuvang chuan, kim lo deuhin ka han sawi a nih chu.

A tawpn atan, Pu Dy. Speaker, thil pakhat lek. Healthcare scheme-a vaibelchhe ₹50 dah hi a lawmawm viau rualin, kan ba Healthcare scheme-a mi 23462-te hnena kan bat vaibelchhe ₹65 pawh hi a rulhna tur a daih lova. Chuvang chuan, kan ba tal rul thei turin khawnpui atang bawk hian ‘a daih tur pek belh dan tur a awm lawm ni’ ka rawn ti a ni e. Ka lawm e.

DEPUTY SPEAKER : Tunge sawi leh ang le? Awle, Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e.

Chief Minister zahawm takin Ni 13-ah budget 2022-2023 a pharh a, ngun takin ka lo chhiar ve a, a tha ka ti khawp mai a, keini ang Mizo tawng thiam lo tan pawh chhiar a nuam a. Vawi tam tak ka chhiar ve a lawmna turte pawh Pu Dy. Speaker, a awm nual a ni. A cover-ah pawh *G-20* symbol hi an dah a, a lawmawm ka ti khawp mai a, CM zahawm tak ngei pawhin a budget speech-ah pawh a sawi lang a.

India sorkar chuan December Ni 1 atangin 2023 G-20 President nihna a chelh a, President nihna a chelh avangin Mizoram-ah pawh G-20 meeting an nei dawn a ni a. Hei hi CM zahawm tak budget speech-a sawichhuah a ni hi lawmawm ka ti a. Chu bakah, keini ang Mizo tawng thiam vak lo te tan pawh he budget speech hi chhiar a nuam a ni. Chuvangin, Finance Deptt. hnathawktu zawng zawngte leh Chief Minister hnenah pawh lawmthu ka sawi hmasa a ni.

Laymen deuhin he budget chungchang hi han sawi ta ila. Pu Dy. Speaker, RD Block chungchang budget speech-a a sawi-lan a ni hi lawmawm ka ti a. Kan BDO office hi official chuan a la function lova. Amaherawhchu, RD Block Tlabung-a awm tur budget speech-a sawilan a nih bakah cheng nuai 20 dah a ni hi kan lawm awm hle a ni. Chuvangin, CM chungah pawh lawmthu ka sawi a ni e.

Pu Dy. Speaker, kan budget 2023-2024 pumpui hi ₹14,209.95 crore a ni a, ₹11,068.76 hi revenue expenditure a ni a, chu chu 78.10% a ni a. Capital expenditure hi 3141.19 a ni a. Pu Dy. Speaker, ka hriat thiam loh chu, hei tunlaiin sorkar hnathawk ten hlawh a hun taka an la thei lo hi mipuiin kan tuar a ni. Revenue expenditure hetiang zah dah a ni chungin engvangin nge sorkar hnathawk hlawh hi a hun takah an dawn theih loh? Hei hi engnge ni a chhan? Tuna kan Finance Minister hi ‘a thiam lo a ni lo maw’ tih kha kan rilru ah a awm a. A hun takah hlawh an lak theihloh avangin a thawktu ringawt nilo, mipui zawng zawngin kan tuar vek a ni. A chhan chu, pawisa hi a circulate ve thin a, sorkar hnathawkin hlawh an lak theih loh chuan kan zavaiin kan tuar phah thin a ni. Chuvangin he thil hi House ah min hrilhfiyah thei se ka duh khawp mai.

Budget hi kan en chuan leiba hi a pung tual tual a. Chuti lain sorkar hnathawk loan la te tan hian a buaithlak em em a, engtikah nge an hlawh a luh dawn an hre si lova, thangthar lo kal zel turte pawh hi hlawh la thei lovin an la awm dawn a ni. Pu Dy. Speaker, i phalnain, helaiyah hian Chief Minister in a sawi a, chapter 16 ah hian – “kum lo kal turah hian sorkarin a leiba a neih zawng zawng belhkhawm chu cheng vaibelchhe 13,584.80 a lo ni dawn a ni” a ti a ni. A tam em em a, hun lo kal zel turahah limit-a kan ding chho tur hi a paw ka ti hle a ni.

Tin, SEDP hi *flagship programme* a ni a; tichuan, tuna kan budget hi budget tawpna a ni a, 2019-2020 chhunga SEDP hnuaiya pawisa dah chu cheng vaibelchhe 750 a ni a, 2020-2021-ah 513 crore, 2021-2022-ah 400 crore, 2022-2023-ah 595 crore te dah a ni bawka. A vaia belhkhawm chu cheng 2258 crore a ni. Amaherawhchu heta tanga mipui hnena thleng chu cheng 150 crore chauh a ni; chu pawh chhungkaw tinah ₹25,000/- chauh a ni. Ka ngaihtuahna ah chuan Pu Deputy Speaker, “₹25,000/- hian chhungkaw pakhatin engtin nge eizawna nghet an siam theih ang” tih hi a ni. Engti mahin he ₹25,000 hian eizawna nghet a siam theiloh a ni. Kum 5 chhungin cheng ₹25,000/- chauh hi chuan he project hi a tihhlahwhtlin theih ngai lovang. Chuvangin, he an flagship programme hi a hlawhchham a ni.

Pu Dy. Speaker, inthlan laia cheng nuai 3 sem tura intiam kha anni a, amaherawhchu tunah an term hi an hmang zo tep a ni a, kum 4 chhungin ₹25,000/-chauh sem a ni hi a pawihle mai. Budget speech-ah sawi-chhuah thil hlawhtling pakhat chu - MNF manifesto pakhat 'Lunglei-Municipal Council din' hi a ni a. January, 2013 khan Lunglei Municipal office hawn a ni hi a lawmawm hle a ni. He sorkar hi kan sorkar hmasa nena compare chuan - NLUP kha chhungkaw 1,31,735 hnenah sem a ni. In tinah 'nuai khat' ti ta ila, engzah nge ni ang? Mahse tun sorkarah chuan chhungkaw 60,000 chauhin an dawng hi a tlem lutuk. Inthlan hmaa an thutiam kha a ni a, mahse an thutiamah an ding thei lo a ni. Chuvangin, mipui hmaah hei hi an insawifiah a ngai a ni.

Tin, Healthcare-ah hian vaibelchhe ₹50 chiah dah a ni a, tuna kan bat tlingkhawm vaibelchhe ₹65,90,84,984 rulhna tur pawh a daih lo a ni; a pawihle mai. Chuvangin Healthcare hi tun sorkar hian a ngai pawimawh lo hi a pawihle mai. Pu Dy. Speaker, kha zawng kha ka sawi theih ni rawh se. Ka lawm e.

DEPUTY SPEAKER : Member zahawm tak, Pu Zothantluanga ka sawm e.

PU ZOTHANTLUANGA : Pu Dy. Speaker, ka lawm e.

Hei wawinah 8th Mizoram Legislative Assembly budget hnuhnung ber sawiho theia kan awm hi a lawmawm hlein ka hria a. Harsatna chihrang hrangin min tuam a, tunah hian kan lo leikang chho ve dawn chauh a, sum leh pai ruahman hi a har hle ang tih ka ring a. Chutihlain kan Chief Minister-ina kan budget a han present a, a thusawi te han chhiar hian a tluangtlam khawp mai a. Hriatfiah a awl a, hriat a nuamin ka hria a, a mizo tawng te, a thu kalmang te hi a tha hlein ka hria a ni.

Engpawh nisela, budget discussion-ah hian ka han sawi ve duh chu - pawisa kan neih tam miao loh chuan kan neih chhun ang-ang ruahmanna siam a harsat zia chu kan hria ang a. Chhengkuaah pawh pawisa hmuh tur a tlem viau chuan ruahmanna siam thiam a har hle a. Kan pawisa hmu tura kan ngaihte kan hmuh kim loh hian chhengkua budget te pawh a buai a, ruahmanna siam pawh awmzia a nei lo fo a ni. Tun kumthar atana kan Chief Minister zahawm tak Finance changtu ni bawkin a pharh tak hi duhthusam a ni lo mai thei. Covid-19 in kum 2020 kumtirh atanga nikum thlengin Mizoram mai ni lovin khawvel leh India State zawng zawngte pawh min tibuai a, khatah khan hmasawna ngaihtuah theih a ni lova, tute pawhin ngaihtuah tur kan buaipui ber tur chu dam khawchhuahna (survival) a ni.

Tunah hian kan boruak a lo zang chho ta a, Covid-in min tibuai lak atangin kan zalen chho ta a. Chuvang chuan, central sorkar pawhin buaina thil chi hrang-hrang - chhiah lakkhawm chungchang te, sum hmuh tur beisei phak loh thinna angah te pawh a lo ziaawm chho ta a. Mizoram-in kan hmuh tura kan ngaih cheng vaibelchhia 3000 chuang zet kan hmu lova, kum hlui budget-ah hian. Chuti chung-chunga sorkar

hnathawk hlawh kan pe te, an arrear te pe thei zela a awm te leh hmasawna tam tak thawha a awm hi, kan hotupa inpekna ropuizia leh sum a hman thiamzia a langin ka hria a.

Tin, sorkarin sum harsatna namen loh a tawk tih hre reng chung a sorkarna neih theih beiseia kawng dik loa mipui hruai tuma harsatna chi hrang hrang kara a sawichhe ngawr-ngawra kan awm te hi ‘kan tih tur a ni ang em aw’ tih hi inngaihtuah a ngai foin ka hria a. Hei, hrileng a ziaawm chho a, hun khirh tak kara budget kan Chief Minister-in a rawn pharh theih hi a lawmawm hle a ni.

Kan sawi tawh angin, sorkar hnathawk hlawh a pung zel a, increment-te pek a ngai zel a, tin, pension te a lo tam zel a. Sorkar hi a upat tulh-tulh chuan pension tana pek tur hi a lo tam ve tulh-tulh bawk a, State upa zawkah pheh chuan sorkar hnathawk hlawh ai hian pension atana an pek a tam zawk em maw ni tih mai tur a nih avangin keini pawn chutiang chu kan dai chho zel ang a. Chuvangin, revenue expenditure hi chu a pun chhoh zel a ngai dawn a ni.

Chutihlai chuan, hmasawna tur hnathawhna tur atan liau-liau a cheng vaibelchhe 3,000 zet mai dah theih a nih hi a lawmawm hle a. Central sorkar atangin hmasawna hnathawhna tur sum tam tak hai chhuah theihna tur atana kan budget-a State-matching share atana sum tam tham tak dah theih a nih hi a lawmawmin ka hria a, hei hian kan Chief Minister zahawmtak hmahlir (vision) a neih that zia a tilangin ka hria. Kan budget pawna mi sum tam zawk hai chhuak turin kan sorkar kal mek hi a rintlak berin ka hria a, *a ngaihna hria* hruaitu kan nei hi mipui kan ni hlawh hle a ni.

Hetiang khawpa hrileng avanga sum harsatna tawk chung a MNF party manifesto SEDP atana chhungkaw 60,000 hnena a thawh-khatna tur atana sum pek a lo nih tawh bakah, tunah hian a dawngtu thlanhhuah chhungkaw kuta lut tur cheng vaibelchhe 300 dah a nih bakah sorkar-in a ngaihpawimawh dang atana a hman tur SEDP-untied a vaibelchhe 25 dah a ni te hi a pawimawh hlein ka hria a. Tichuan, SEDP pumpui atana sorkarin ruahmanna a dah chu cheng vaibelchhe 595 a tling a ni. A hma a sawitu ina a sawi, “Engatinge nuaih 3 in tiam a, in pek loh?” tih kha sorkar kalphung pangngai hun harsa chi hrang hrangin a delha, a tihbuai nilo, sorkar ang khan kal ni ila, Covid te, Burma buai te, ramri buai avanga buaina leh harsatna kan tawh te, kan State thenawm ten kan lifeline block-a thla chuang ei leh bar lut thei lova min siamna zawng zawng te. Tin, mihring mai ni lo, ran vawk-hri avanga kan vawk tamtak a thih te, khawchhakah lir te a nghing chamchi a, chungte chuan kan nunphung a ti buai em em a ni.

Hetiang harsatna hi awmlo sela chuan, kan sorkar-ina flagship programme-*cheng nuai 3 sem* hi a sem ngei ngei ang tih Zoram mipui ten kan hriat a thain ka hria. Chutiang khawpa khawvel ramdangte, India sorkar leh state dang zawng zawng te pawh ina harsatna kan tawk chung-chung pawha kan intiamna a nih avanga ngaihpawimawha kan

Chief Minister-in a kan budget atana SEDP-second phase a pek tur te leh second installment a pek tur te a han dah leh hi a ropuiin, a lawmawm hlein ka hria.

Tin, healthcare chungchang kha kan sawi a; a dik e. Hei, healthcare scheme atana crore 50 ni lovin, lottery atanga crore 10 dahbelh nen khan crore 60 dah a ni a, 'hei hian a daih dawn lo a ni' tih pawh kan hria. Chuvang chuan, Asian Development Bank atangin crore 1000 kan hotute'n an zuk dil a, central sorkar pawhin hei hi a lo pawmpui tawh nghe-nghe a ni. Crore 60 bakah khan 'crore 1000 kan la hmu leh dawn a ni' tih hi kan hriat a thain ka hria a. Chuvang chuan, sorkar hnathawk ve lo te, an damloha an inenkawl na senso atana hetiang tak maia ngaihtuahtu sorkar kan nei hi a ropui takzetin ka hria. 'Mirethei te hmangaihtu sorkar neih hi ava han thlamuanthlak em!' tih hi ka han sawi duh a ni.

Tin, MLA-te kan bial chung theuha mipuite tana tangkai tur hmasawna hna kan thawh theih nan MLA-Area Development Fund atan cheng vaibelchhe 60 min han dahsak leh te hi a ropui takzetin ka hria. Tin, a hma amite khan an sawi tawh angin, kan thalai ten All India Service leh Central Service lama a tam thei ang ber an luh ve theihna atana nuai 50 dah te hi a ropui takzet a, heipawh hi a tul ang zela dahbelh theih tura tih niin ka hria. Tin, college hrang hrang atana nuai 120 zet mai dah te, Mizoram-a tlawmngai pawl hrang hrang tena khawtlang rawngbawl na hna an thawh tanpuina atana cheng nuai 50 dah anih te hi a lawmawm takzetin ka hre bawka a ni.

Tin, eng chhit man tlawm zawka mipuiin an chawi theihna tur *direct subsidy* atana cheng vaibelche 158 dawn mai budget-a a han dah te hi mipui tan a va lawmawm em! Kan sorkar hi 'mipui lam tang sorkar' dik tak a ni tih hei hian a ti lang chiang hle a ni. Sawi tawh angin, hrileng avangin India Economy a tlu-sawp a, tunah hian a lo tho-chhuak ve tan chiah a, kan sorkar pawhin tangka kumthar atangin awmze neiin sum a ruahman ve tan dawn chauh a ni. Chief Minister-in a pharh tak budget pawh hi duhthusam a ni lo; chuti chung-chuan tun dinhmunah chuan hei aia tha ruahman thiam hi an awm ka ring lo. Heti chung a hmasawna tur tam tham tak ruahman a ni hi a lawmawm tak zet a ni. Tui pump-na tur atana crore 35.5 dah te, buhfai subsidy atana crore 50 han dah te, tin Samagra-SSA zirtirtute hlawh tihpunna tur atana crore 91.25 han dah te, tin, Women & Child Development Deptt-ICDS-a hnathawkte, sorkar-in a tihtawp tawh te, central-in a tihtawp te, hnathawktute hlawh atan crore 8.03 a han dah te, Lunglei Municipal Council inrel bawl na atana crore 1.28 an dah te hi ram inrelbawl na tur atan te, Lunglei khawpui inrelbawl na tur atana hma an la te hi kan sorkar hian a ti tha takzet in ka hria a ni.

Tin, pawimawh em em chu - heng budget-a hotupa kan Chief Minister-in a rawn dah pawimawh tak takte han ngaihtuah hian, 'hei hi mipui budget dik tak, mi rethei leh harsa zawkte chawikanna tur atana dah a ni' tia kan pawm mai hi kan tih tur niin ka hria. Ka lawm e, Pu Dy. Speaker.

DEPUTY SPEAKER : Tunge sawi leh ang le? Insawi chhawk deuh kha in ti a, veilama mite kha han beisei ta che u ila; a tlem bik chuang lo. A awmzia chu, minister te hian an portfolio a an department budget sawi hunah hian an zuah deuh nge ni, general discussion-ah an sawi vak ngai ta lo a, chuti anih chuan a inzat chiah - a vei lama thu leh dinglama thu member kha in inzat chiah mai a.

Aw le, member zahawm tak Pu Vanlalhlana ka sawm e.

PU VANLALHLANA : Pu Dy. Speaker, ka lawm e.

Eighth Assembly- hi kan lo tawp dawn hnai ta a. Kan lo ngaihthlak tak ang khan, tun hi budget session hnuhnung ber niin, *budget pharh hnuhnung ber* a lo ni ta a.

Vanneihna tak kan nei pawhin ka hria a. Eighth Assembly hun chhungah hian *Golden Jubilee*, Mizoram Legislative Assembly lawmna kan nei thei hlauh hi a lawmawm hlein ka hria a, member-te pawh kan hlim tlangin ka hria. Tin, a leh lamah chuan lungngaihthlak, thu ngaihthlak nuam vak lo, boruak nuam vaklo kan tawn chang a awm a. Tun term chhungah Andrew L. Thangliana, Member zahawm tak kan han sun a. Tin, member thenkhat chungah action lak a ngai a, anti-defection law te chelek a ngai a. Pu Lalduhoma chu disqualify a ni a, vanneithlak takin thlan tlin a lo ni leh a. Tin, chumi hnuah minister zahawm tak Pu Beichhua chu step-down tir a ni a, a chhan engnge kan va hre phak ve lova, a hnuah private membership te pawh remove a ni a, keini chuan kan lainat khawp mai.

Tun, sorkar hi ‘MNF party sorkar’ kan ti thei a. Han ngaihtuah kir vang vang ila, 2018 inthlan te leh sorkar lo pian dan kha, he sorkar lo pianna chhan hi *pathum* a awmin ka hria a –

Pakhatna: Congress khan kum 10 ro an rel a, mipui khan an ning ve thawkhat tawh a ni; chuvangin MNF lamah khan vote a seng nasa in ka hria a,

Pahnihna: SEDP an nei a, an uluk em em mai a, a sawi pawh an sawi nasa a. Mipuiyah an zuar a, cheng nuai 3 aia tlem lo chhungtin te hnenah NLUP pawh dawng tawh ina an dawn theih tur thu kha tlangaupui a ni a, nuai 1 NLUP dawng tawh, lo in tem-vir tawhte khan an awih tlat a, an rawn bawh ta hum-hum a, chuvangin an tling ta a ni.

Pathumna: MNF candidate-te kha in tha; tuna MLA thu zawng zawngte kha minister-ah awm ta ula, tun aiin hmasawanna a kal chak zawk ka ring. Nangni pawhin hnathawh te in han tum thin a, mahse, in ti thei si lo; ‘in chep a ni’ tih pawh kan rawn hre vek a ni.

Pu Speaker, helai sorkar a dinna chhan kan rawn sawi kha, SEDP kha mipui ten an beiseina pawh a sang viau a ni. Amaherawhchu, tih a ngai ta a, SEDP han sawi hian sorkar hma leh sorkar hnu hi sawi a ngai ta a. Sorkar hmasa SEDP hi chu - mipui hnenah an kal a, hmun tina an inzawrh danah hi chuan “budget-ah kumtin cheng vaibelchhe 1000 aia tlem lo kan dah ang” tih kha a ni. Congress-in cheng *nuai 1* an lo sem tawh si a, awihawm tawh turin *nuai 3* neih kha chu mitinin an chak vek a ni. An sorkar ta cheng a, vawikhat mah hi vaibelchhe 1000 pawh an dah lo; hmun thenkhatah pheih chuan vaibelchhe 1500 dah an intiam a ni. 2019-2020 khan vaibelchhe 750 an dah a, 2020-2021 ah vaibelchhe 517, 2021-2022 ah vaibelchhe 400, 2022-2023 ah vaibelchhe 700, 2023-2024 ah vaibelchhe 595 an dah a, an thutiamah an dinglo tluan chhuak parh a ni.

Chuvangin he SEDP hi ‘inbumna bawm’ tih a lar bawh a, ‘intihderna bawm’ a niin ka hria. Cheng nuai 3 ai ah cheng 25,000 chhungkaw sing 6 hnenah an intiam ta a, ‘engatinge an thutiamah dingin, a chhungkua te an tihlem mai loh’ ka ti a, cheng nuai 3 hi chu sem rawh se, chhungkua hi ti tlem mai rawh se. Hetia dinchhuahna tham tur mang lo pocket money inpai vel tham tur lek chhungkaw dinchhuahna vel tur a an sem si hi chu, a motive hi a dik tawh lo. “Nakinah kan la sem chhunzawm ang” an ti a, an thei ang emaw chu; inthlan paltlang a ngai tlat tawh mai a.

A tirah chuan SEDP tih hlawhtlin tir tak tak an tum pawhin a lang a, board-te an han siam a, MLA te, Ex-MLA te Chairman-na hnuaiah an han kal a, thawh tur teh chiam an hre lova, office-ah te thuin games te an khel mai mai ni tein a lang a, nuai tam tak ralna ram a ni ringawt mai a ni.

Sorkarin harsatna an tawh a, covid avang te, ramri-buaina avang te, refugee avang tein nasa takin harsatna an tawh. Hetia ram pumin harsatna an tawh hian, party-party sawi lovin kan tangrual a, mizo mipui - kohhran te, mimal te’n Chief Minister-*relief fund* ah thawh lawm nasa takin an thawh a, MLA te pawhin kan hlawh leh M-LAD fund atangin theih ang tawkin sorkar kan pui a, kohhrante, sorkar hnathawkte inzawmkhawm pawl te pawhin theih ang chin-chinah kan pui a ni. Amaherawhchu, sorkar hi inrenchem lamah a kal lo hle niin a lang a.

Tuna kan sorkar hrawn mek hi ‘MNF sorkar’ kan ti a, underground sorkar te pawh lo siam tawh anni a. Underground sorkarah chuan ‘propaganda’ a pawimawh em em a, propaganda tel lovin *Underground Movement* a kal thei lo a ni. Underground leader-te an nih tawh avangin, he *Overground*-a constitutional government an chelh hnuaiah pawh hian ‘underground ang hian mipuite hi min kaihruai em ni’ tih tur hian an awmin ka hria a ni. Tunah chuan constitutional government hnuaiah kan awm tawh a, mipui te’n a tak tak (reality) hi kan beisei tawh a ni. Thu mai-maia tihlawm chi hi Mizo mipui kan ni tawh lo. Chuvangin, engkim hi a tak tak hmuh kan duh tawh a ni. Mumang ram leh thil harsa, duhthusam ramah hian kan cheng peih tawh lova. Tuna kan sorkar

min kalpui dan hi kan tawngkhawp lo khawp em ni? Underground sorkar kalpui angin min kalpui niin kan hria.

Ramri buai chungchangah te pawh, kan hre tak-tak anih chuan kan thuruk hriat te chu hman a hun tawh a ni. Kan mipuite, kan kut-hnathawktu te'n an hnathawh hmunphiah te an kek ngam tawh lo; chutiang khawpa dan-chep chu kan ni tawh a ni.

Ka sawi leh duh chu Health Care chungchang a ni a. A enkawltu minister hi thahnem a ngai khawp mai a. MLA zingah pawh “campaign-a in bial in fan hunah healthcare chungchang hi lo sawi ve teh u; in bial mipuite pawh lo fuih ve teh u” an ti thin. Mipuite tana tha a nih avangin zirtirna pawh kan pe nasa a, registration pawh hi a tha viau a ni. Ocotber 2021 - January 2023; kum khat leh thla thum chhung hian nuai 798 registration fee dawn a ni. Chutihlai chuan, Starred Question kan en chuan - “Enga tan nge heng registration fee hi hman a nih?” kan tih chuan, a thawhtute, registration fee a sang-bia petute an harsat leh an damloh huna an hman tur emaw kan tih lai khan, a hmanna te chu – hlawh atan te, motor hire nan te, meeting thingpui senso bill atan te, chutiang tan chuan crore 6 chuang hman a ni daih mai a ni.

Tin, tunah hian healthcare bill mi 23,602 in submit-in, a value chu a vaiin vaibelchhe 65.90 chuang a ni. Tuna a landan chuan, “healthcare-ah nuai 60, mamawh apiang te'n a tul huna an hman turin chhungkaw tin tan nuai 2 dah a ni” tih hnuaiah khan, “tun financial year chhung hian cheng nuai 50 healthcare-in a dawng” tih kha Starred Question chhanna atangin kan hmu a ni. Tin, chumi piah lamah chuan, lottery atanga hlawkna vaibelchhe 10 chu pek a ni bawk a. Tunah hian kan ba zawng-zawng hi crore 69 a ni a. Kan mipuite hi damlo bawk, retheih bawk, inenkawl zel dawn pawh ni se sum nei tawh lo vek an ni. Chuvangin, healthcare pawisa hi an nghakhlel em em mai a ni. A vaiin a theih loh anih pawhin, ‘a seniority tal chuan healthcare pawisa hi pechhuak se’ tih kha kan ngen duh a ni.

Chief Minister budget speech-ah hian ‘mau’ a lang miah lo mai a, ‘engatinge ni aw’ ka ti a; kan flagship programme pakhat a ni a. Eng pawh nise, nimina Venus Bamboo Industry chungchangah khan kan House Leader khan thil a rawn sawichiang ta viau a, thil tha zawng zawng hi thlen te pawh a har a ni ang e; Mau Industry hi ‘a hlawhchham’ tih a rawn pawmin ka hria. “Mau chu khutah a awm a, a rit si a, kawng a tha bawk si lova, a raw material-ah problem a awm a ni” tih kha a rawn hmu a ni. Amaherawhchu, mipui min zirtirna - mau hmanga *millionaire* min nihtir a tumna te. Assam chu India ramah mauah hausa ber an ni; chutihlai chuan, Assam chu ‘a hausa’ tih kan hre ngai lo; tin, mau hmanga millionaire pawh kan hre lo; IAS bansan pawh kan hre lo; bansan tum pawh kan hre lo. Chutiang chu a nih avangin thil sawi fimkhur a thain ka hria.

He sorkarah hian power, electric siam-chhuahah hi chuan a beidawnthlakin kan hria a. Budget speech hmasa zawng zawngah khan ‘power generation’ tih hi a awm thin a, Governor address-ah pawh ‘power generation’ tih hi a sawi thin a ni. Tun tumah hi chuan power generation chungchang a sawi ta miah lova. Power purchase-na (leina) tur crore 400 a awm a, transmission siamna tur a awm leh a, power generation atan pawisa dah a ni ta miah lo a ni. Heti khawpa pachhia, electric nei lo si, a hming tala power generation atana token money pawh dah awm lova a han blank ta tawp mai hi chu, power chungchangah hian hmalak ngaihna hi an hre thlawt lo niin a langin ka hria.

Tin, PMJVK chungchang hi tawitein ka sawi duh a. Health, education leh skill development atan bik ‘*scheme*’ a ni tih kan hria. “Kan Sport Minister hian engtin nge sport atan hetu tak mai hian a hailuh theih” tih hi. Lehlamah chuan a fakawmin a fel ang reng ka ti a. Amaherawhchu, school leh kan health system a chhiat em em lai a ni a, dispensary leh damdawiin tlakchham kan ngah em em a. Chutihlai chuan kan minister dangte hian enga tinge an haichhuah ve theih loh? Recommend an hmu tha ve lo em ni? ‘A thil hriat leh a thiamna te hi department dangte chhawr tham hian share ve thei se’ tih kha ka sawi duh a.

A tawp berah chuan, thil lawmawm tak mai lo langa chu - MLA te’n kan fund kan hmu thin pangngai ang kan hmu tur nia lang hi a lawmawm khawpin ka hria a. Inthlan kum a ni a, kumin November thlaah chuan kan inthlang mai dawn a; ‘kan fund te hi a kim hian min pe thei hram se la’ tih kha ka han ngen duh a ni, inthlan hmain. Ka lawm e.

DEPUTY SPEAKER : Tunge sawi leh ang le? Awle, sawi tum-awm in awm lo tlat mai; ban phar tumah in awm si lova.

General Discussion hi nihnih awh a ni a, Thawhle Ni lamah sawi leh tur kan nih avangin Member zahawm tak takte hian nidang kan la nei a, rilruin chu lamah chuan in inbuatsaih a nih hmel riau mai a.

Sawi tur kan awm tawh loh chuan kan chawl tawh mai dawn a ni. Tichuan naktuk, Ni 17 (Zirtawpni) zing dar 10:30-ah session kan tan leh ang.

Sitting is adjourned (3:18 PM)